

Yuwarwar Yesu Kristu beɓeɓ mata banare niɓ Yon ikala iryiɓ

¹ Be, asaɓ kaɓ hime gabe kame mata forok yenayiɓ goyen Yesu Kristu beɓeɓ nikala nirkeb gago kaɓ hime. Al Kuruɓ beɓeɓ mata heɓ ga moɓ forok yiniɓ tahaɓ goyen meteɓ marminiɓ yikala yiri yeɓ Yesu momoɓ iryiɓ. Irkeb Yesu Kristu beɓeɓ meteɓ marminiɓ kurab ne Yon gayen momoɓ irayiɓ yeɓ miyoɓminiɓ hulyaɓ irke waɓ momoɓ niryiɓ. ² Nebe Al Kuruɓyen mereya Yesu Kristu beɓeɓ tagalde hinhin mereya kuruɓ goyen delner yeneɓ hinhem geb, goke al momoɓ yirde himyen.

³ Niɓgeɓ al kura mata kame forok yetek goke yitiɓ gayen kapyaaɓ hinayiɓ mar gobe Al Kuruɓ beɓeɓ guram yirde tareɓ yiryenɓ. Irde mata kame forok yetek goke yitiɓ gayen kapyaaɓ heke nurde gama irde hinayiɓ marbe Al Kuruɓ beɓeɓ guram yirde saɓiɓ yiryenɓ. Gobe mata goke katiɓ gwahade po heɓ ga ma forok yiniɓ tahaɓ geb, gago diɓenɓ hime.

Yon beɓeɓ taun 7 bana Yesuyen alya bereya haɓ goyen goke asaɓ kayiɓ

⁴ Be, ne Yon beɓeɓ deɓ Yesuyen alya bereya Esia* naɓa bana niɓ taun 7 bana haɓ mar goyen goke asaɓ gago kaɓ hime.

* **1:4:** Esia naɓa gobe gayenter niɓ Esia naɓa kuruɓ goke ma yitiɓ. Gayenterbe Turki inenɓ hanyen.

Be, bikkenɗi hinhin, haɗka hi, irde kame wayyen
al Al Kurunɗi beɗenɗi buninɗi dirde bitinɗi
yisikamke iginɗi hiwonɗi yenɗi gusunɗanɗi irde
hime.

Irde Holi Spirit mata wukkenɗi wor po 7 minɗanɗi†
gore wor gwahade po dirwonɗi yenɗi nurde
hime.

5 Irde Yesu Kristu wor buninɗi dirde bitinɗi
yisikamke iginɗi hiwonɗi yenɗi nurde hime.

Yesu Kristube Al Kurunɗi mere binɗe mat
fudinde wor po tagalde hinhin.

Yenɗe kamtinɗe mat huward huward mata goyen
yenɗi wa minɗi uryinɗi.

Yenɗe megen ninɗi doyanɗi mar karkuwanɗi gote
doyanɗi al.

Yenɗi beɗenɗe neɗi gayen bubulkuɗne wor po yenɗi
nurd dunenɗe darim wok irde kamɗinɗe
mat mata bulunɗi bana mat dad sinɗa dirɗinɗi.

6 Irde Naniɗi Al Kurunɗi yufukde derde yenɗi
dolonɗi ird ird mata doyanɗi mar dirɗinɗi.

Ninɗeɗe deɗe tunɗunɗi yanya tareɗyabe huginɗi
huginɗi Yesu hitte po hiyenɗi. Fudinde wor
po.

7 Ga nurnanɗi, yenɗe kigarinɗinɗi faykek hende
katenɗi hikeɗi
al tumɗanɗi kennayinɗi.

Hakde fakamaminɗi marya megen ninɗi alya bereya
tumɗanɗi daninɗi gwaha irtirinɗi yenɗi esenɗi
obam tinayinɗi.

Gabe fudinde forok yiyyenɗi! Fudinde wor po.

† 1:4: Namba 7 gote minɗe Al Kurunɗi asanɗeɗe bulunɗi kuram
monɗi, wukkeɗi wor po goke yitinɗi.

⁸ Be, Al Kurun̄ taren̄min̄ kurun̄ wor po, Doyan̄ Al Kurun̄ belej, “Nebe Alfaya Omegaya,‡ det kurun̄ gayen min̄ urmirin̄ al, irde det kurun̄ gayen pasi ird ird al,” yen̄ hi. Yen̄be bikken̄ hin̄hin, gayenter hi, irde kame wan̄ wan̄ albe yen̄ gogo po.

Yon belej Yesu Kristu kinyin̄

⁹ Be, ne Yonbe den̄ya tum̄nan̄ Yesuya hen̄be dadatin̄ yara himirin̄ hime. Irde yen̄ ge ten̄ kanduk tum̄nan̄de yenen̄ hite. Neya den̄yabe Al Kurun̄ belej alya bereyamin̄ doyan̄ yird yird bana gon̄ tum̄nan̄ hite. Irde yen̄ ge ten̄ kanduk bana hite gega, goke mukku ma ten̄ goya goya san̄in̄ hen̄ hen̄ ge pin̄en̄ ma hen̄ hite. Be, ne belej Al Kurun̄yen mereya Yesu belej tagalde hin̄hin mereya kurun̄ goyen tagalde himeke al belej goke igin̄ ma nurdeb nade Patmos motmotde gago neramin̄. ¹⁰ Be, Doyan̄ Al Kurun̄yen nan̄a nalu kurare kurab Holi Spirit belej san̄in̄ po ketal nuryin̄. Irkeb harhokne belej mat al melak kura bigul mere yara kurun̄ po forok yeke nurmirin̄.

¹¹ Meremin̄be gahade: “Mata kenen̄ ha gayen asan̄de kaya. Irdeb asan̄ go Yesuyen alya bereya sios taun 7 bana han̄ goke ten̄ kerke kuyen̄. Taun 7 gobe Efesus, Sumena, Pergamum, Taiataira, Sardis, Filadelfiyabe Laodisia,” in̄yin̄.

¹² Be, al mere nira go kene yen̄be tigiri timirin̄. Tigiri ten̄be hulsi go hende yerde yusun̄ yurde han̄yen kutum 7 gol hora belej po yirtin̄ goyen yin̄mirin̄. ¹³ Irdeb hulsi 7 go kahaltebe al kura

‡ **1:8:** Alfabe Grik mere kan̄ kan̄ matare mere bilmin̄ mehen̄de, munan̄ Omegabe funan̄de. Alfa gote min̄be min̄ urd urd nin̄ yitin̄, munan̄ Omegabe pasi ird ird nin̄ yitin̄.

“Al Urminj” inenj hanjen goyen kinmirinj. Yenbe amil sobam kerke kurkuŋ kahaŋ patare po hitinj, irde gol belej po kaŋ yara irtinj goyen dumunđe bili irtinj miŋyaŋ. ¹⁴ Tonanya tonan yuwalhenya gobe sipsip wuyhenya gagapya faykek wor po go gwahade hinhin, irde dilinjbe kak melak yara agat urde hinhin. ¹⁵ Irde kahaŋbe ain kura baras inenj hanjen goyen kakde kunga tike buk yen hel yen hanjen go gwahade yara hinhin. Irde merembe hamula kurunđe mat fe solok yen migirinj kurun po tej hitinj yara nurmirinj. ¹⁶ Haniŋ yase belejbe dinambe 7 yanarde hinhin. Irde fuleŋare nin bidila kura misiŋ kurhan kurhan goyenbe mohon bana mat waŋ hinhin. Irde kimiŋbe naŋa tareŋ po timiytinj yara hinhin.

¹⁷ Be, go kenenbe kafura wor po heŋ al kamtinj yara heŋ kahaŋ miŋde kateŋ dokolhonj yugulunj timirinj. Irkeb yen belej haniŋ yase ne hende kerde gaha ninyinj: “Kafura ma hawayinj. Nebe det kurunj gayen miŋ urmirinj al, irde det kurunj gayen pasi ird ird al. ¹⁸ Nebe gwahader hitinj al. Kammirinj gega, sopte huwarde gwahader po delne gergeŋ himyen gago nenha. Nebe kamde kamde mataya kamtinj marte gasunya doyaŋ yird yird tareŋne yaŋ. ¹⁹ Niŋgeb ge belej mata gayenter forok yen haŋ, irde kame forok yenayinj kurunj goyen delger yenen ha gayen asaŋde kayayinj. ²⁰ Hanne yase bana dinambe 7 haŋ gaya hulsi 7 gol belej po yirtinj gote miŋ banare hitinj gobe gahade: dinambe 7 gobe Yesuyen alya bereya sios taun 7 bana haŋ gote Al Kurunyen miyoŋ 7 nin yitinj. Irde hulsi 7 gobe Yesuyen alya bereya sios

taun 7 bana haɗ goke yitiɗ,” niniyiɗ.

2

Efesus niɗ Yesuyen alya bereya niɗ yiriɗ

¹ Be, al gore sopte gaha niniyiɗ: “Gebe Yesuyen alya bereya sios Efesus taunde haɗ mar goyen doyaɗ yirde merene basaɗ heɗ saba yirde hiyen al go hitte mere gahade kayayiɗ:

Mere gabe al dinambe 7 haniɗ yase belɗ yanarde hulsi go hende yerde yusuɗ yurde haɗyen kutum 7 gol belɗ po yirtiɗ goyen kahalte kuɗ waɗ teɗ hiyen al gore gaha yiriɗ:

² Nebe deɗ belɗ mata igiɗ teɗ metɗ saɗiɗ po teɗ haɗyen, irde kanduk yeneɗ haɗyen goke mukku ma teɗ saɗiɗ po heɗ haɗyen goyen nurde himyen. Irde al kura dufay buluɗ miɗyaɗ mar goya hitek ma nurde haɗyen go wor nurde himyen. Irde al kura yiɗgeɗ ge yeɗ, ‘Neɗbe Yesuyen mere basaɗ mar,’ yeɗ al hoyaɗ usi yirde haɗyen mar goyen tuɗaɗ yurde meremiɗbe usi goyen keɗkela bebak teɗ haɗyen go wor nurde himyen. ³ Deɗbe ne niɗ teɗ kanduk kurayen kurayen yeneɗ haɗyen gega, goke mukku ma teɗ tareɗ po heɗ haɗyen. Kanduk goke yul ma yeɗ haɗyen.

⁴ Goyenpoga matatiɗ kura goke igiɗ ma nurde hime gobe gahade: deɗbe haɗkapyaya Al Kurunya al hoyanya niɗ amaneɗ wor po nurd yuneɗ hinhan gega, gayenterbe go mata gob tubul teɗ gwaha ma teɗ haɗ. ⁵ Deɗbe mata igiɗ wor po teɗ hinhande mat katamiɗ gobe uguɗ wor po katamiɗ geb, goke dufay henayiɗ. Irde

mata bulunƙin yubul tenƙe yen ge bitin mulƙan hekeɓ haƙƙaƙya mata igin ten hinhan goyen sopte ten hinayin. Munan gwaha ma tinayinƙe ne beɓen den hitte kuƙɓe nere hulsi den bana hi goyen gasuƙenɗe mat ten siƙa irmeke gabutin gobe hubu po hiyyen. ⁶ Gega mata igin kura ten hanyen goke amanen nurde hime gobe gahade: Nikolasyen usi mere gama irde hanyen mar gore mata ten hanyen goke ne beɓen igin ma wor po nurde himyen gwahade goyen po, den wor go mar goke igin ma nurde yunen hanyen. Gobe igin wor po ten hanyen.

⁷ Niƙgeɓ al kirmin minyan marbe Holi Spirit beɓen sios momon yirde hi goyen nurde bebak tinaƙ ko. Al kura mata bulunya kandukya goyen fole yirnayin marbe ne beɓen ok yinmeke nene huginƙen hitte he iginen Al Kurunyen gasuƙenɗe han goyen igin nenayin,” yirin.

Sumena nin Yesuyen alya bereya sios nin yirin

⁸ Be, al gore sopte gaha ninyin: “Gebe Yesuyen alya bereya sios Sumena taunde han mar goyen doyan yirde merene basan hen saba yirde hiyen al hitte mere gahade kayayin:

Mere diren tihim gabe det kurun gayen min uryin irde kame det kurun gayen pasi iryen al gote mere. Yenƙe kamiƙin gega, sopte huwaryin. Mereminƙe gahade: ⁹ Nebe den beɓen kanduk yenen hanyen irde detin minmon geb det nin amu wor po hen hanyen gobe nurde himyen. Gega Al Kurunyen gasuƙenɗe nin detbe budam wor po den hitte han! Nebe al kura yinƙen ge yen, ‘Nenƙe Yuda

mar,' yef al usi yirde han mar gore mere bulun mat dirde hanjen gobe nurde himyen. Go mar gobe Yuda mar wor po mon, irde Satanyen mere gama irnin yef gabu irde hanjen mar yef yenen himyen. ¹⁰ Niñgeb denbe kanduk yennayin goke kafura ma henayin. Ga nurna. Satan belen den goyen, "Gwaha yirmeke Al Kurun nin dufaymin taren irtin goyen tubul tina," yef den han bana gon nin al kura yade koyare yiryen. Irde den goyen bulun bulun dirke nana fay 10 gayen kanduk bana hinayin. Gega ne nin dufaytin sanin irtin gobe sanin po tanarnayin. Mudunke kamnayin goke bada ma henayin. Gwaha tinayinbe kame gote murungem igin wor po Al Kurunya huginjen hen hen goyen dunen.

¹¹ Niñgeb al kirmin minyan marbe Holi Spirit belen sios momon yirde hi goyen nurde bebak tina ko. Al kura mata bulunya kandukya goyen fole yirnayin marbe kamnayin gega, sopte kamde kamde gasun kak alare ma kunbe Al Kurunya hugin hinayin," yirin.

Pergamum nin Yesuyen alya bereya sios nin yirin

¹² Be, al gore sopte gaha ninyin: "Gebe Yesuyen alya bereya sios Pergamum taunde han mar goyen doyan yirde merene basan hen saba yirde hiyen al hitte mere gahade kayayin:

Mere diren tihim gabe fulenare nin bidila kura misin kurhan kurhan goyen minyan al gote mere. Mereminbe gahade: ¹³ Nebe den goyen Satan belen nigen tiyun wor po yef

nurde tareɗ po metenɗ teɗ hiyende gor haɗ gobe nurde himyen. Gega denbe kanduk go bana haɗ goke kafura ma heɗ ne po gama nirde haɗ. Denbe ne niɗ dufaytinɗ tareɗ irtinɗ goyen tubul ma teɗ haɗ. Irde ne niɗ binde mat fudinde wor po tagalde hiyen al Antipas goyen al belen tauntinɗ bana goɗ mayke kamyinɗ goyenter wor denbe ne niɗ dufaytinɗ saɗinɗ irtinɗ goyen tubul ma tiyaminɗ. Fudinde, tauntinɗ bana goɗbe Satan belen heɗ metenɗ teɗ hi.

¹⁴ Goyenpoga matatinɗ kura igin ma nurde himyen goyen momonɗ direɗ tihim gobe gahade: den haɗ bana goɗ niɗ al kurabe Balamyen saba gama irde haɗ. Balambe Moap nanare niɗ doyanɗ al kurunɗ Balak belenɗ daha mat Israel mar usi yirke det toneɗ al belen yirtinɗ goyen galak yirtinɗ binde nenayinɗ irde leplep matare katnayinɗ yen goke saba iryinɗ.

¹⁵ Gwahade goyen po, kuratinɗ kurabe Nikolasyen usi saba gama irde haɗ. ¹⁶ Niɗgeb matatinɗ goyen yubul teɗ Al Kurunɗ niɗ bitin mulganɗ hiyyenɗ. Monɗo ne belen den hitte aranɗen kun fulenare niɗ bidila mohonner hiyen goyen teɗ go mar goya artek geb.

¹⁷ Niɗgeb al kirminɗ minyanɗ marbe Holi Spirit belen sios momonɗ yirde hi goyen nurde bebakinɗ ko. Al kura mata bulunya kandukya

goyen fole yirnayin marbe kame ‘mana’* ba-nare hitin goyen kura yunen. Irde hora faykek go hende al deɓe gergeɓ katin goyen wor yunen. Al deɓe gobe hora goyen tiyyen al go po ga nuryen,” yirin.

Taiataira niɓ Yesuyen alya bereya sios niɓ yirin

¹⁸ Be, al gore sopte gaha ninyin: “Gebe Yesuyen alya bereya sios Taiataira taunde haɓ mar goyen doyaɓ yirde merene basaɓ heɓ saba yirde hiyen al hitte mere gahade kayayin:

Mere direɓ tihim gabe Al Kurunyen Urminde mere. Dilinbe kak melak yara agat urde hinhin. Irde kahaɓbe ain kura baras inen hanɓen goyen kakde kumba tike buk yen hanɓen go gwahade yara hinhin. Mereminbe gahade: ¹⁹ Nebe mata dahade ten hanɓen goyen nurde hime. Irde den belen Al Kurunya al hoyanya niɓ amaneɓ nurd yunen hanɓen irde Al Kurun niɓ dufaytin saɓin irde yen ge meten ten hanɓen goyen nurde hime. Denbe yen ge ten kanduk yenen haɓ gega, goke mukku ma ten tareɓ po heɓ hanɓen goyen wor nurde hime. Gayenter den belen mata igin ten hanɓen gobe haɓkanya tinen henya mata ten hinhan gote folek wor po ten hanɓen goyen manan nurde hime.

* **2:17:** Mana gobe bikken Israel mar Isip naɓa tubul ten sawsawa po kurun naɓa bana kun hikeya Al Kurun belen binɓe yunen hinhin go goyen. Mana kurabe kuwe bana heɓ Biɓa Bokis bana hinhin gega, Babilon mar belen Israel marte naɓa waɓ yakira tikeya bokis gobe bana kurin. Gega Israel marbe kame Mesaia wayyen nalurebe Bokis gobe kawan forok yiyyen yen nurde hanɓen.

20 Goyenpoga matatin kura goke igin ma nurde himyen. Matatin gobe gahade: denbe bere kura goyen denya hej bikken Yesebel† mata ten hinhin goyen gama irde hiyen gega, goke bulunen ma nurde tubul tike denya hi. Bere gobe yingen ge yen, 'Nebe Al Kurunen mere basan bere,' yen hi. Bere gore meten marne usi saba yirde mata bulun ten ten belnende yukukeb al kurabe lelep mata ten han, irde kurabe det tonen al belen yirtin goyen galak yirtin binje nene han. 21 Nebe bere goyen Al Kurun nin bin mulgan hej mata bulunmin yubul ten ten nalu kerd unmin gega, gwaha titek ma nurde hi. 22 Ningeb bere goyen temeymeke kanduk kurun bana katyen. Irde al berem yan belen bere goya duwan ten ten mata ten han yen marbe ulinde kanduk kurun forok ird yunen. Go mar gobe bere gote mata bulun gama irtin goyen yubul ma tinayinbe kanduk kurun forok irde yunen. 23 Nebe al kura bere gote saba po gama irde dirnen wen hitin mar goyen gasa yirmeke kamnayan. Gwaha yirmeke gab Yesuyen alya bereya tumnan alyen binde nin dufay kenkela nurde hi albe yen po yen bebak tinayin. Nebe den belen mata ten han kurun gote murungem dunen.

24 Be, den Taiataira taunde nin sios bana bere

† 2:20: Yesebelbe bikken Israel marte doyan al kura Ahapyen berem. Bere gobe unguira dolon yirdeb Israel mar manan usi yirke bere gote mere gama irde unguira dolon yirde hinhan. (1 Doyan Mar 16:31; 18:4; 21:1-26; 2 Doyan Mar 9:22; 9:30-37)

gote saba ma gama irde Satanyen mata kura banare niñ wor po inen hanjen gote saba ma nurde hanjen mar goyen momon diren tihim. Mere ga diren tihim gabe kanduk hoyan kura dune yen ma dinen hime. Merenebe gahade: ²⁵ Denbe saba igin titin goyen tareñ po tanarde hinayin. Irkeb ne wan denen.

²⁶ Niñgeb al kura mata bulunya kandukya goyen fole irde dufayne po gama irde hike kun kun nalu funan forok yiyyen marbe nanan karkuwan kurayen kurayen goyen doyan yird yird sanin yunen. ²⁷ Goke tenbe Al Kurunyen asande gahade katin hi:

‘Yenbe doyan al kurunyen kutum kura ain belen po irtin goyen tanarde mel go doyan yirde hiyen.

Yen belen mel go gwamuñ yurke kuwe yase galan yitin yara hen bulun wor po henayin,’ yitin. *Tikin 2:9*

Niñgeb yitin gwahade goyen po Adone belen alya bereya doyan yird yird sanin nuntin geb, ne wor mata bulunya kandukya goyen fole yirde dufayne po gama irde hinayin mar goyen doyan mar karkuwan hen hen tareñ yunen. ²⁸ Irde tareñne turñun yan wor po bayfon yara goyen wor yunen. ²⁹ Al kirmin minyan marbe Holi Spirit belen sios momon yirde hi goyen nurde bebak tinañ ko,” yirin.

3

Sardis niñ Yesuyen alya bereya sios niñ yirin

¹ Be, al gore sopte gaha ninyiñ: “Gebe Yesuyen alya bereya Sardis taunde hañ mar goyen doyañ yirde merene basañ heñ saba yirde hiyen al hitte mere gahade kayayiñ:

Mere direñ tihim gabe Holi Spirit mata wukken wor po 7 miñyañ goya dinambe 7 goya yanarde hi al gote mere. Meremiñbe gahade: nebe mata dahade teñ hanyen gobe nurde hime. Al hoyañ belenbe igiñ po hañ yeñ deney hañ gega, delnerbe al kamtiñ yeñ deney hime. ² Niñgeb huwarnañ! Irde matatiñ igiñ yubul titek heñ hañ goyen sopte yanarde sañiñ po yirnayiñ. Gobe Al Kurun diliñde matatiñ gobe hako po hañ yeñ deney hime geb, gago dineñ hime. ³ Niñgeb hañkapy saba damiñ dirke nuramiñ goke bitiñ sir ma yenayiñ. Irde saba goyen gama irde mata buluñtiñ goyen yubul teñ Al Kurun niñ bitiñ mulgañ hiyyey. Munañ huwarnayiñ moñbe ma nurde hikeya kawe mar wañ hanyen gwahade po, deñ hitte kuñ matatiñ gote muruñgem buluñ duneñ. Deñbe ne gayen deñ hitte kuñ kuñ nalu goyen epte ma bebak tinayiñ. ⁴ Goyenpoga deñ sios Sardis taunde hañ mar bana goñ niñ al kura matamiñbe uliñ umña tikiñ ma yirtiñ yara Al Kurun diliñde wukken hañ. Mel gobe Al Kurun diliñde wukken hitiñ mar gote amil faykek wor po goyen yunmeke hor teñbe neya heñ mata huwak teñ hinayiñ. Mel gobe gwaha yirtek po hañ geb, gogo yireñ. ⁵ Niñgeb al kura mata bulunya kandukya goyen fole yir-nayiñ marbe mel go yireñ gwahade goyen po,

amil faykek wor po goyen hor yirde yuneŋ. Irde deŋembe Al Kurunya hugiŋeŋ hitek marte deŋem katiŋ asaŋde mat yade siŋa ma yireŋ. Gwaha titŋeŋbe Adoneya miyoŋmiŋyat diliŋ mar mel goyen nere yeŋ nurd yuneŋ. ⁶ Al kirmiŋ miŋyaŋ marbe Holi Spirit beleŋ sios momoŋ yirde hi goyen nurde bebak tinaŋ ko,” yiriŋ.

Filadelfia niŋ Yesuyen alya bereya sios niŋ yiriŋ

⁷ Be, al gore sopte gaha ninyiŋ: “Gebe Yesuyen alya bereya sios Filadelfia taunde haŋ mar goyen doyaŋ yirde merene basaŋ heŋ saba yirde hiyen al hitte mere gahade kayayiŋ:

Mere direŋ tihim gabe wukkeŋ wor po, irde mere fudinde po teŋ hi al gote mere. Yeŋbe Al Kurun beleŋ alya bereyamiŋ doyaŋ yird yird gasuŋ Dewityen taun ineŋ haŋyen gote miŋ al geb, taun yame degel degel ki goyen miŋyaŋ. Yeŋ beleŋ yame goyen hol iryeŋbe al kura beleŋ epte ma tayyeŋ. Irde yeŋ beleŋ yame goyen tayyeŋbe al kura beleŋ epte ma digilyeŋ. Meremiŋbe gahade: ⁸ Nebe deŋ beleŋ mata dahade teŋ haŋ goyen nurde hime. Deŋ goyen igiŋ Dewityen taun bana hurkunayiŋ yeŋbe yame degelde dunmiŋ ga hi ga kennaŋ. Ne beleŋ yame degelde dunmiŋ gabe al kura epte ma tayyeŋ. Deŋbe saŋiŋtiŋ kurun moŋ gega, merene po gama irde ne niŋ helwaŋ ma heŋ haŋyen goyen nurde hime. ⁹ Ga nurnaŋ! Al buda Satanyen mere gama irde haŋ mar gobe usi mar wor po. Go mar gobe yiŋgeŋ ge yeŋ, ‘Neŋbe Yuda mar,’ yeŋ haŋ gega gwahade

moŋ. Nebe go mar goyen bul yirmeke deŋ hitte waŋ kahaŋtiŋ miŋde urguŋ kanayiŋ. Irdeb ne beleŋ bubulkuŋne wor po yeŋ nurd dunen himyen goyen keneŋ bebak tinayiŋ. ¹⁰ Deŋbe kanduk yeneŋ mukku ma teŋ tareŋ heŋ heŋ ge piŋeŋ ma heŋ hinayiŋ yeŋ tareŋ po dinmiriŋ goyen po gama irde hanyen geb, ne wor kanduk kuruŋ forok yeŋ yeŋ nalure kanduk gore buluŋ dird dird belneŋbe pet tiyeŋ. Kanduk gobe alya bereya megen haŋ kuruŋ gote dufaymiŋya matamiŋya tuŋaŋ yurd yurd niŋ forok yiyyeŋ gega, deŋ goyen kanduk go bana mat dad siŋa direŋ.

¹¹ Nebe heŋ ga ma wayeŋ. Niŋgeb mere fudindeya mata huwakya deŋ hitte hi goyen keŋkela po tanarde hinayiŋ. Gogab kame matatiŋ iŋiŋ gote muruŋgem goyen al hoyan beleŋ epte ma goran dirnayiŋ. ¹² Niŋgeb al kura mata buluŋya kandukya goyen fole yir-nayiŋ marbe Al Kurunyen ya balem gote to-lamiŋ yireŋ geb, Al Kurunya hugiŋeŋ hinayiŋ. Yeŋbe ya balem go ma po tubul teŋ siŋare kunayiŋ. Nebe Al Kurunyen deŋemya taun-miŋ gote deŋemya goyen mel go uliŋde kayeŋ. Irde deŋne wor kayeŋ. Taun gobe Yerusalem gergeŋ, Al Kurunyen gasuŋde mat katyeŋ. ¹³ Al kirmiŋ miŋyaŋ marbe Holi Spirit beleŋ sios momoŋ yirde hi goyen nurde bebak tinaŋ ko,” yiriŋ.

Laodisia niŋ Yesuyen alya bereya sios niŋ yiriŋ

¹⁴ Be, al gore sopte gaha ninyiŋ: “Gebe Yesuyen alya bereya sios Laodisia taunde haŋ mar goyen

doyaŋ yirde merene basaŋ heŋ saba yirde hiyen al hitte asaŋ gahade kayayiŋ:

Mere direŋ tihim gabe mere fudinde gote miŋ alyen mere. Yeŋbe biŋa tiyyiŋ goyen fudinde po gama ird ird al, irde Al Kurunŋ niŋ fudinde po tagal tagal al. Al gobe det kurunŋ gayen Al Kurunŋ beleŋ forok yiryiŋ gote doyaŋ al. Meremiŋbe gahade: ¹⁵ Nebe deŋ beleŋ mata dahade teŋ haŋyen goyen nurde hime. Dende Al Kurunŋ gama ird ird matatiŋbe saŋiŋ wor po moŋ, irde buluŋ wor po moŋ, kahaltem po haŋ. Gobe fe kura uka wor po moŋ, irde uysuŋ wor po moŋ go gwahade goyen. Goyenbe deŋ goyen uka hiniŋ yeŋbe ukam po hiwoŋ, munaŋ uysuŋ hiniŋ yeŋbe uysuŋ po hiwoŋ yeŋ nurde hime. ¹⁶ Deŋbe fe kura uka wor po moŋ, irde uysuŋ wor po moŋ yara geb, mohoŋner mat meyaŋ titiŋ yara dirde demeyde harhokne duneŋ tihim. ¹⁷ Deŋbe dindigeŋ ge yeŋbe, ‘Neŋbe igiŋ wor po hite. Mataniniŋbe igiŋ po teŋ hityen geb, mata igiŋ hoyaŋ kura neŋ titekbe hubu,’ yeŋ haŋyen. Goyenpoga deŋbe al bunineŋ wor po, mata igiŋ kura deŋ hitte ma hi goyen bebak ma teŋ haŋ! Deŋbe kaŋaŋ mar, kupsoŋ heŋ kuŋ haŋ, irde diltiŋ titmiŋ yeŋ deneŋ hime. ¹⁸ Niŋgeb ne hitte mat gol hora* kakde kumga tike igiŋ wor po hitiŋ goyen damu tinaŋ dineŋ hime. Gogab Al Kurunŋ diliŋde samuŋtiŋ yaŋ mar wor po henayiŋ. Irde amil faykek† ne hitte damu tinaŋ dineŋ hime. Gogab kupsoŋ heŋ

* **3:18:** Al Kurunŋ diliŋde mata igiŋ wor po goke yitiŋ. † **3:18:** Amil faykekbe mata huwak wukken wor po goke yitiŋ.

memyak hitiŋ haŋ goyen amil gore ulitiŋ aw duryeŋ. Irde dilitiŋ titmiŋ go sope yird yird goke he fimiŋ kura ne hitte damu tinaŋ dineaŋ hime. Gogab igiŋ naŋkennayiŋ.

¹⁹ Nebe al kura bubulkuŋne wor po yeŋ nurde yuneŋ himyen marbe buluŋ tike goke yineaŋ teŋ saba yirde himyen. Niŋgeb mata igiŋ gama yird yird mata goke po nurde hinayiŋ. Irde mata buluŋtiŋ yubul teŋ yeŋ ge bitiŋ mulgaŋ hiyyeŋ. ²⁰ Ga nurnaŋ! Nebe yamere huwarde yame mayde hime. Al kura merene nurde yame degelde nunkeb bana goŋ hurkuŋbe yenya dula teŋ yenya hireŋ.

²¹ Niŋgeb al kura mata bulunya kandukya goyen fole yirnaŋiŋ marbe ne beleŋ al buluŋ fole irde deŋne yaŋ wor po heŋ Adoneya har gwahade goyen po, yeŋ wor doyaŋ mar karkuwaŋ heŋ neya heŋ heŋ saŋiŋ goyen yuneŋ. ²² Al kirmiŋ miŋyaŋ marbe Holi Spirit beleŋ sios mere momoŋ yirde hi goyen nurde bebak tinaŋ ko,” yiriŋ.

4

Al Kurunyen gasuŋde niŋ taun goke yiriŋ

¹ Be, al gore gwaha yiriŋ go kamereb Al Kurunyen gasuŋde hurkuŋ hurkuŋ yame figilitiŋ hinhin goyen forok yeke kinmiriŋ. Irkeb al melak kura haŋkapyo bigul mere titiŋ yara nurmiriŋ goyen gore po, “Hende gar waya. Irkeb kame mata dahade forok yenayiŋ goyen gikala gireŋ,” ninyiŋ. ² Irkeb goya goyen po Holi Spirit beleŋ tareŋ po ketal nuryiŋ. Irkeb kemne mat Al

Kuruṅyen gasuṅ bana Doyaṅ Al Kuruṅyen keperd keperd gasuṅde al kura keperde hike kinmiriṅ. ³ Doyaṅ Al Kuruṅyen keperd keperd gasuṅde gor keperde hinhin al gote dinsokbe yaspa horaya hora bukkenṅ konilian ineṅ hanyen go gwahade yara agat urde hinhin. Irde gamatsaw beṅ keperd keperd gasuṅ go milgu irtiṅ goyen kinmiriṅ. Gamatsaw gobe hora digulak emeral ineṅ hanyen gwahade yara melak heṅ hinhin. ⁴ Be, Doyaṅ Al Kuruṅyen keperd keperd gasuṅ go siṅakyanṅbe doyaṅ marte keperd keperd gasuṅ 24 gore milgu irtiṅ hinhan. Go hereṅbe Al Kuruṅyen alya bereyat doyaṅ mar parguwak 24 beṅ kipirtiṅde hinhan. Mel gobe amil faykenṅ hor yirde tonanṅdebe doyaṅ alyen tonanṅhor yirtiṅ hinhan. ⁵ Be, Doyaṅ Al Kuruṅyen keperd keperd gasuṅde matbe dagamel teṅ daga kateṅ hururuṅ teṅ hinhin. Keperd keperd gasuṅ goyen diliṅ marbe hulsi 7 beṅ melak heṅ toltol yeṅ hinhan. Hulsi 7 gobe Holi Spirit mata wukkenṅ wor po 7 miṅyanṅ go goyen. ⁶ Irde makanṅ ala galas beṅ po irtiṅ yara wukkenṅ wor po goyen wor keperd keperd gasuṅ go diliṅ mar beṅ hinhin.

Be, doyaṅ mar 24 gote keperd keperd gasuṅ Doyaṅ Al Kuruṅyen keperd keperd gasuṅ milgu irtiṅ goyen kahal banabe det biṅfut miṅyanṅ Al Kuruṅ beṅ yirtiṅ kura sipte hinhan. Det gote biṅya harhokya beṅbe diliṅ beṅ po sam yirtiṅ hinhan. ⁷ Det biṅfut miṅyanṅ goyen kurabe laion yara kinmiriṅ. Kurabe bulmakaw yara, irde kurate kimiṅbe al kimiṅ yara kinmiriṅ. Irde funanṅbe buntuluṅ naṅa kota foy titiṅ yara gor

hike kinmiriñ. ⁸ Det binfut miñyañ sipte goyen yuñkureñ yuñkureñbe tapen 6 miñyañ hinhan. Irde uliñ piginbe diliñ belen po tumñañ sam yirtiñ hinhan. Tapen yufuk bana manañ diliñ belen sam yirtiñ hinhan. Det binfut miñyañ gobe nañkahalya wawunya hugiñen gaha yeñ hinhan:

“Al wukken, al wukken,

Doyañ Al Kurunbe al wukken wor po.

Al Kurun tarenmiñ kurun wor po gobe

bikken hinhin, gayenter hi,

irde kame wayyen,” yeñ hinhan.

⁹ Det binfut miñyañ gore Doyañ Al Kurunyen keperd keperd gasunđe keperde heñ gwahader hitiñ al goyen denem turnuñ yañ irde isoka irde metenmiñ goke igiñ nurd unen hinhan. ¹⁰ Gwaha ten hike goya goyenbe Al Kurunyen alya bereyat doyañ mar parguwak 24 belenbe Doyañ Al Kurunyen gasunđe keperde hinhin al gote diliñ mar urgun kañ gwahader hitiñ al goyen dolon irde hinhan. Mel gobe doyañ mar karkuwanđe tonanħormiñ goyen yugu ten Doyañ Al Kurunyen keperd keperd gasuñ goyen kahañ miñde yerdeb gaha yeñ hinhan:

¹¹ “Gebe Doyañ Al Kurunniniñ, irde Al Kurunniniñ.

Ge belen po ga det kurun gayen yirariñ.

Dufayge po gama irde det kurun gayen forok yirariñ.

Niñgeb denen turnuñ yanja sañiñ kurunya tetek po ha.

Irde palap girtek po ha,” yeñ hinhan.

5

Asanya Sipsip al dirin dirnya

¹ Be, go kamereb Doyan Al Kurunyen keperd keperd gasunđe kipirtin hinhin al gote hanin yase banabe asan sobam bili irtin kura goyen tanarde hike kinmirin. Asan gobe harhok belenya bin belenya tumnan katin, irde det unguni yara goyen 7 yade asan bili irtinde gor sanin yirtin hinhan.

² Be, nebe Al Kurunyen miyon tarenmin kurun wor po kura gore hokde, “Ganun al belen det unguni yara asan yulyanen bili irtinde taga yurtin goyen epte yukala ten asan go digilyen?” yeke kinmirin. ³ Goyenpoga al gore kura asan ulyan go epte degeltek mon. Asan goyen bana kenen kenen manan epte mon. Al Kurunyen gasunđe nin, megen nin, megen bin bana nin al ma det kura belen epte ma asan go degelde kentek hinhan. ⁴ Irkeb al wukke wor po kura gore asan goyen epte degelde go binde kentek minmon wor po kenenbe goke esitinde hinhem. ⁵ Irkeb Al Kurunyen alya bereyat doyan marte parguwak kura belen, “Esen ma yo! Yekop urmin kura Yuda, denem kurabe Laion inen hanen gote dari gama irde forok yirin al gobe Dewityen minde mat watin. Yenbe asogom al bulun goyen fole irtin. Al gore gab det unguni yara belen asan sobam bili irde taren yirtin det 7 goyen epte yukala ten digilyen,” ninyin.

⁶ Be, go kamereb al kura Sipsip al dirin dirnen go gwahade yara kinmirin. Sipsip go kenenminbe bikken mayke kamtin yara kinmirin. Be, Sipsip dirnen go Doyan Al Kurunyen keperd keperd

gasuŋ kaħalte wor po gor huwarde hinhin. Keperd keperd gasuŋ goyen siŋakyaŋbe det binfut miŋyaŋ sipteya Al Kurunyen alya bereyat doyaŋ marte parguwakya belej milgu irtin hinhan. Sipsip dirneŋ gote hirkambe 7, irde diliŋ wor 7 hinhan. Diliŋ 7 gobe Holi Spirityen mata wukkeƙ wor po 7 miŋyaŋ go goyen. Holi Spirit gobe Al Kurun belej alya bereya megen haŋ kurun goke teŋ kerke kuriŋ. ⁷ Be, Sipsip dirneŋ gore Doyaŋ Al Kurunyen keperd keperd gasunde hinhin al go hitte kuŋ haniŋ yase bana asaŋ ulyaŋ bili irde unguni po saŋiŋ irtin hinhin goyen tirin. ⁸ Be, yeŋ belej asaŋ go tekeb det binfut miŋyaŋ sipte goya Al Kurunyen alya bereyat doyaŋ marte parguwak 24 gore Sipsip dirneŋ kimiŋ mat urgun kayamiŋ. Urgun kayamiŋ mar gobe yunƙureŋ yunƙureŋ tikiŋde niŋ det hap ineŋ haŋyen goyen nende gigen yanartiŋ hinhan. Irde koron gol hora belej po yirtin goyen wor yanartiŋ hinhan. Koron bana gonbe det hamiŋ igin muŋ wor po go goyen miŋyaŋ hinhan. Det hamiŋ igin muŋ wor po gobe Al Kurunyen alya bereya belej Al Kurun mere irde haŋyen go goyen. ⁹ Be, mel gobe tikiŋde niŋ det hap ineŋ haŋyen goya koron gol hora belej yirtin goyen yanarde tikiŋ gergeŋ kura hamiŋ. Tikiŋmiŋbe gahade:

“Gebe mugunke kamariŋ.

Irde darige wok yitiŋ go hende harde alya bereya Al Kurun hitte yumulgaŋ tiyaŋiŋ.

Alya bereya gobe miŋ kurayen kurayen, meremiŋ kurayen kurayen, dari miŋ kurayen kurayen, naŋa kurar niŋ kura niŋ yumulgaŋ tiyaŋiŋ.

Goke tenbe ge belen po gab epte asan goyen ten degelayin.

¹⁰ Ge belen mel goyen alya bereya Al Kurun belen doyan yird yird mar yirarin.

Irde Al Kurun dolon ird ird mata doyan mar yirarin.

Irkeb yen belen det kurun megen han kurun goyen doyan yirde hinayin,” yamin.

¹¹ Be, go kamereb nebe Al Kurunyen miyon budam wor po epte ma kapyan hetek goyen yenenbe meremin manan nurmirin. Miyon goreb Doyan Al Kurunyen keperd keperd gasun, det binfut minyan sipte goyen, irde Al Kurunyen alya bereyat doyan marte parguwak goyen milgu yiramin. ¹² Irdeb hokde po tikin gahade hamin:

“Sipsip dirnen mayke kamyin gore po gab epte sanin tetek hi.

Irde epte Al Kurunyen samun tumnan ingin yawartek hi.

Dufay wukkek, sanin, den turun yan goyen ingin yende hetek hi.

Irde palap irde isoka irtek albe ge po,” yamin.

¹³ Be, go kamereb det kurun gayen tumnan tikin hen hinhan. Nan kinde nin, megen nin, megen bin bana nin, irde make nde nin det kurun goreb gahade tikin hamin:

“Doyan Al Kurunyen keperd keperd gasunde kipirtin hi al goya Sipsip dirnenya goyen isoka yirde palap yirde den turun yan yirde tare kurun gobe gwahader yen po yunen hitek,” yamin.

14 Irkeb det binfut minyan sipte gore wol henbe, “Fudinde wor po,” yamin. Irkeb Al Kurunya alya bereyat doyan marte parguwak beley dokolhon yugulun ten urgun kanbe Al Kurunya Sipsip dirnya goyen dolon yiramin.

6

Asan bili irde tarey yirtin unguni goyen yukala ten asan go digilyin

¹ Be, go kamereb Sipsip dirnen beley asan bili irde unguni 7 po sanin yirtin goyen unkenmin ukala tiyyin goyen kinmirin. Irkeb det binfut minyan sipte hinhan goyen unken kura beley “Waya!” yirin. Mere tiyyin gobe daga migirin yara tiyyin. ² Irkeb hos faykek kura goyen forok yeke kinmirin. Al kura hos go hende hinhin al gobe hite haniinde manan hinhin. Irde doyan alyen tonanhor hor irde untin. Irkeb megen hike kwa kurun goyen bana gon kun fulena tiyyin. Yen beley po megenya alya yad yad nin ten hos hende kurin.

³ Be, Sipsip dirnen beley unguni kura sopte ukala tikeb det binfut minyan sipte goyen kura beley wor sopte, “Waya!” yeke nurmirin. ⁴ Be, gwaha yekeb hos hoyan kura forok yirin. Hos gobe bukenhel yitin wor po. Hos go hende keperde hinhin al gobe alya bereya megen han gayen bin kamke awalikde hen hen mata goyen ten sina irke al yingen ulin kadam mugunen ten kamde kamde sanin untin. Irde fulenare nin bidila kurun kura goyen wor untin.

⁵ Be, Sipsip dirɓeɓ beɓeɓ uɓɓuni tareɓ yir-
tiɓ 7 bana goyen karwomiɓ ukala tikeb det
biɓfut miɓyaɓ sipte goyen hoyan kura beɓeɓ
wor, “Wayal!” yeke nurmiriɓ. Be, gwaha yekeb
hos kura delne mar forok yeke kinmiriɓ. Hos
gobe halkeɓ wor po. Hos go hende keperde
hinhin al gobe det kanduk tuɓan teɓ teɓ det
kura haniɓde tanartiɓ hinhin. ⁶ Irkeb det biɓfut
miɓyaɓ sipte hinhan bana goɓ mat al melak kura
forok yeke nurmiriɓ. Merebe gahade: “Albe
meteɓ teɓ hinayiɓ gega, biɓgebe budam ma forok
yeɓ hinayiɓ. Irkeb naɓa fay uɓkureɓ bana meteɓ
teɓ muruɓgem teɓ hinayiɓ gote hora gore biɓge
damu teɓ hinayiɓ gega, biɓge budam ma yade
hinayiɓ. Niɓgeb biɓge damu tiniɓ yeɓ wit damu
teɓ hinayiɓbe koron dirɓeɓ uɓkureɓ gwahade
po teɓ hinayiɓ, munan bali damu teɓ hinayiɓbe
koron mukɓeɓ karwo gwahade po yade hinayiɓ.
Goyenbe mel gore olip fimiɓya wain fimiɓyabe
igiɓ yawarnayiɓ geb, olip heya wain heyabe
buluɓ ma yirayiɓ,” yiriɓ.

⁷ Be, Sipsip dirɓeɓ beɓeɓ uɓɓuni tareɓ yir-
tiɓ 7 bana goyen siptemiɓ ukala tikeb det biɓfut
miɓyaɓ sipte hinhan goyen funan beɓeɓ, “Wayal!”
yeke nurmiriɓ. ⁸ Be, gwaha yekeb hos kura
delne mar forok yeke kinmiriɓ. Hos gobe wul-
sakkeɓ. Hos go hende keperde hinhin al gote
deɓembe Kamde Kamde. Yeɓ hos hende waɓ
hikeb Al Metebe harhokde go po bindere gama
irde waɓ hike kinmiriɓ. Al irawa gobe alya
bereya megen han kurun gayen pota yirke buda
sipte hekeb buda uɓkureɓbe buluɓ yirke kamde

kamde sanɓin yuntin. Niɓgeb buda unɓkuren goyen bana al kurabe fulenɓe nin bidilare kamnayan, biɓge kamde kamnayan, kurabe garbam heɓ kamnayan, irde kurabe dapɓa duwi kafuram wor po gore gasa yirke kamnayan.

⁹ Be, Sipsip dirɓen belen unɓuni sanɓin yirtin 7 bana gon siptesononmin goyen ukala tiyyin. Irkeb al buda kura Al Kurunyen mere gama irde tagalde kun hike gasa yirke kamamin mar gote tonenɓe Al Kurun galak ird ird alta yufukde hike yinmirin. ¹⁰ Mel gore hokde po, “Doyan Al Kurun, tarengebe kurun wor po. Gebe wukken wor po, irde meregebe fudinde wor po. Goyenbe megen han mar belen mudunke kamtirin goyen goke daha nanɓa gab merere yerde matamin gote murungem bulun goyen wol heɓ yunayan? Sobamde po doyan hetek we?” inamin. ¹¹ Irde mel gobe unɓkuren unɓkuren amil fayken nende gigen yuntin. Irdeb, “Den mudunke kamamin gwahade goyen po, Doyan Al Kurunya heɓ kadtin yago hitin marya Doyan Al Kurunyen meten mar kadtin hitin goyen wor gasa yirke kamde hinayan goyen kun kun budam heɓ ep heke gab muduntin mar goyen merere huwarnayan geb, goke doyan heɓ hinayan. Go nalu gobe ulyande ma hikeya forok yiyyen,” yinke nuramin.

¹² Be, Sipsip dirɓen belen unɓuni taren yirtin 7 bana goyen 6min ukala tiyyin goyen kinmirin. Irkeb ninina kurun wor po forok yirin. Nanɓe kidoma bulun po hirin. Gobe meme sikken halken wor po gore ulinhor irtin gwahade yara hirin. Irde gagasibe dari yara bukkenhel wor

po hiriŋ. ¹³ Irde dinambe yagobe naŋkiŋde mat suk yeŋ megen katamiŋ. Dinambe gobe mene kurun harde fik he igineŋ haŋkapok fuguru tike megen kateŋ hanyen go gwahade tiyamiŋ. ¹⁴ Naŋkiŋbe asaŋ sobam bili irtiŋ yara bili irke hubu hiriŋ. Duguya motmotyabe tumŋaŋ gasuŋeŋde mat yade hoyande yirtiŋ. ¹⁵ Irkeb megen niŋ doyaŋ mar karkuwaŋ, doyaŋ mar, fuleŋa marte doyaŋ mar karkuwaŋ, al horam yaŋ mar, saŋiŋ miŋyaŋ mar, al kurate yufuk bana heŋ muruŋgem moŋ duliŋ meten teŋ haŋ maryabe yiŋgeŋ dufaymiŋde haŋ marya tumŋaŋ busa-harde duguyaŋ hurkuŋ horabok bana hinhan, irde kurabe hora karkuwaŋ kahalte mabok biŋde hinhan. ¹⁶⁻¹⁷ Mel gobe duguya hora karkuwaŋya goyen mabokde heŋbe, “Doyaŋ Al Kurunyen keperd keperd gasuŋde keperde hi al goya Sipsip dirŋeŋya gote bearar goyen ganuŋ mar beŋeŋ epte saŋiŋ heŋ fole irnayiŋ? Hubu wor po! Niŋgeb deŋ duguya hora karkuwaŋya, neŋ hende katnaŋ. Irdeb Doyaŋ Al Kurunyen keperd keperd gasuŋde keperde hi al gote diliŋde hitek moŋ geb, bana dernaŋ. Irkeb Sipsip dirŋeŋ gote bearar go ma kenteŋ,” yamiŋ.

7

Alya bereya 144,000 goyen basiŋa yiryiŋ

¹ Be, go kamereb Al Kurunyen miyoŋ sipte beŋeŋ megeŋ muruŋ kurhan kurhan huwarde hike yinmiriŋ. Miyoŋmiŋ sipte gobe moŋgo mene huwarde megeŋya makaŋyabe heya buluŋ yiryenkek yeŋbe mene beŋeŋ sipte goyen pet

teŋ hinhan. ² Irke Al Kurunyen miyoŋ hoyan kura naŋa waŋ waŋ beleŋ mat waŋ hike kinmiriŋ. Yeŋbe alya bereya Al Kurun gwahader hitiŋ beleŋ basaŋa yiryiŋ goyen kimiŋde soŋ yird yirdde niŋ det goyen miŋyaŋ wake kinmiriŋ. Be, miyoŋ gore miyoŋ sipte, megeŋya makaŋya buluŋ yirtek tareŋ yuntiŋ goyen kuware po hoy yirdeb yinyiŋ. ³ “Neŋ beleŋ Al Kurunniŋiŋ gote meten mar kimiŋde soŋ yird yird goyen pasi irteke gab megeŋ, makaŋya heya goyen gwamuŋ yurnayiŋ,” yinyiŋ. ⁴ Irde alya bereya Al Kurunyen meten mar kimiŋde soŋ yirtiŋ goyen kapyan heŋ pasi irdeb, “Soŋ yirtiŋ mar tumŋaŋbe 144,000,” yeke nurmiriŋ. Kimiŋde soŋ yirtiŋ mar gobe Israel mar al miŋ 12 bana mat watiŋ. ⁵ Go mar gobe gahade:

Yuda miŋde niŋbe 12,000,
 Ruben miŋde niŋbe 12,000,
 Gat miŋde niŋbe 12,000,
⁶ Aser miŋde niŋbe 12,000,
 Naptali miŋde niŋbe 12,000,
 Manase miŋde niŋbe 12,000,
⁷ Simeon miŋde niŋbe 12,000,
 Liwai miŋde niŋbe 12,000,
 Isakar miŋde niŋbe 12,000,
⁸ Sebulun miŋde niŋbe 12,000,
 Yosep miŋde niŋbe 12,000,
 Benjamin miŋde niŋbe 12,000.

Al buda kurun beleŋ Al Kurun dolon iramiŋ

⁹ Be, go kamereb al buda kurun wor po epte ma kapyan hetek goyen delne mar forok yeke yinmiriŋ. Mel gobe naŋa karkuwan karkuwan, miŋ

kurayen kurayen, sikken umña kurayen kurayen, irde merem kurayen kurayende mat watiñ. Mel gobe amil fayken hor yirdeb Doyañ Al Kurunyen keperd keperd gasunya Sipsip dirñenyat diliñ mar huwarde patila yuwalñen yanarde hinhan.*

¹⁰ Irde kuware po,

“Dumulgañ tej tej mata gobe Al Kurunñiniñya Sipsip dirñenya hitte mat watiñ.

Al Kurunbe Doyañ Al Kurunyen gasunde keperde hi!” yamiñ.

¹¹ Be, Al Kurunyen miyoñ beleş tumñañ Doyañ Al Kurunyen keperd keperd gasunya Al Kurunyen alya bereyat doyañ marte parguwakyabe det binfut miñyañ sipteya goyen gote harhokde huwarde milgu yiramiñ. Irdeb Doyañ Al Kurunyen keperd keperd gasuñ beleş goñ diliñ mar wulgurut yeñ kimiñ megen irde Al Kurun dolon iramiñ. ¹² Dolon irde heñyabe gaha yamiñ:

“Fudinde wor po!

Al Kurun isoka irde deñem turnuñ yañ irde hitek!

Dufay wukkekyatareñya sañinyabe hugiñen

Al Kurunñiniñde po henayiñ.

Yeñ po ga igiñ nurd unen palap irde hitek!

Fudinde wor po!” yamiñ.

¹³ Be, go kamereb Al Kurunyen alya bereyat doyañ marte parguwak 24 bana goñ niñ al kura beleş, “Al buda amil fayken hor yirtiñ mar gabe ganuñ? Irde mel gabe damde mat watiñ?” ninen gusuñan niryiñ. ¹⁴ Irkeb ne beleş wol heñbe, “Doyañ al, gebe nurde ha,” inmiriñ. Irkeb yeñ

* **7:9:** Patila yuwalñenbe al buluñ fole irtiñ goke yitiñ.

belen, “Al buda gabe kanduk kurun yenen hinhan gega, sanin hen watin mar. Mel gabe amil hor yirtin goyen Sipsip dirnen de dari belen po halde faykek wor po yiramin. ¹⁵ Gwahade ningeb mel gore Al Kurunyen ya balem bana hen Doyan Al Kurunyen keperd keperd gasunde gon dilin mar nan kahalya wawunya dolon ird ird mata ten han yen. Irkeb Doyan Al Kurunyen keperd keperd gasunde keperde hi al gore mel goya hen yufukde yerde doyan yirde hiyen. ¹⁶ Irkeb mel gobe sopte bin ge ma kamnayan, irde fe nin ma yiryen. Irde nana ma, kak uka wor po kura gore epte ma bulun yiryen. ¹⁷ Gobe Sipsip dirnen, Doyan Al Kurunyen keperd keperd gasun kahalte hi al gore sipsip doyan al yara hen mel go doyan yirde hiyen geb, epte ma bulun henayan. Yen belen mel go bul yirde Al Kurunya huginen hen hen fe forok yen han yen gasunyan yukuyen. Irkeb Al Kurun belen mel gote dilin fimin tunnan halde yunyen,” ninyin.

8

Asan bili irtin unguni taren yirtin goyen funan ukala tiyyin

¹ Be, Sipsip dirnen belen asan ulyan bili irtin goyen unguni taren yirtin 7 bana goyen funanmin ukala tiyyin. Irkeb 30 minit gwahade Al Kurunyen gasunde migirin minmon, din den iramin. ² Go kamereb Al Kurun dilin mar miyon 7 huwarde han yen goyen yinmirin. Miyon gobe bigul 7 yunke yanaramin.

³ Irkeb Al Kurunyen miyon hoyan kura belen det hamnen yan kumba ten tenje nin koron gol hora belen po irtin goyen tenbe Al Kurun galak ird ird alta dilin mar huwarij. Yenbe Doyan Al Kurunyen keperd keperd gasun dilin mar alta gol po irtin go hende det hamnen igin kumba ten ten goyen kurun po yawarij. Gobe Al Kurunyen alya bereya mere irde hanjen mar goya gabu yirde Al Kurun galak ire yenbe gogo tiyyin. ⁴ Irdeb det hamnen yan goyen kumba tike kaki goya Al Kurunyen alya bereya belen mere irde hanjen goya tumnan gabu hen Al Kurun hitte hurkurin. ⁵ Irke gab miyon gore det hamnen kumba ten tenje nin koron goyen tenbe alta hende kak hinhin goyen farij. Irdeb goyen ten megen timiyyin. Irkeb dagamel ten daga katen hururun ten niniya tiyyin.

Bigul 7 mere tiyamin

⁶ Be, gor matbe hanƙapya Al Kurunyen miyon 7 gore bigul 7 yawamin goyen fu yirnin tiyamin.

⁷ Be, miyon 7 bana goyen mehenje nin gore wa bigulmin fu iryin. Irkeb kigarin bilmin hora yara goya kak dariya suluk irtinya goyen kigarin kattin yara kurun po katyin. Irkeb megen kurun gayen kurar kurar humga kurin. Humga kurin gobe megen gayen patke karwo hiyyen, irde unƙurenbe humga kuyen go gwahade hirin. Irde he megen han manan gwahade po tiyamin. Irde yamunbe tumnan humga kwamin.

⁸ Be, go kamereb miyon 7 bana gon hoyan kura belen bigulmin fu iryin. Gwaha irkeb det kura dugu kurun kak humga kun hinhin yara goyen

makan alare timiytin kinmirin. Irkeb makan ala kurun kurhanbe dari hirin. Gobe makan ala pota yirke karwo hitin goyen unjkurenbe dari hiyyen go gwahade goyen. ⁹ Irkeb makan de nin det binfut minyan pota irde buda karwo yirtin bana gon buda unjkurenbe tumnan kamamin. Irde hakwa yago manan pota irde buda karwo yirtin bana gon buda unjkurenbe gwamun yuryen go gwahade yiryin.

¹⁰ Be, go kamereb Al Kurunyen miyon 7 bana gon karwomin belen bigulmin fu iryin. Gwaha irkeb dinambe kurun milin wor po hulsi melak hen hi yara gore nan kinde mat fe karkuwanya fe muknenya hende katyin. Gobe fe karkuwanya fe muknenya gabu yirde buda karwo yirtin bana buda unjkuren go hende katyen go gwahade goyen. ¹¹ Dinambe gote denembe "Urek". Dinambe gore katkeb fe buda gobe urek hamin. Irke al budam wor po fe urek hitin go nene kamamin.

¹² Be, go kamereb miyon 7 bana gon siptemin belen bigulmin fu iryin. Irkeb nanan dilin goyen paten karwo irke unjkurenbe det kura belen mayke aymuk iryin. Gagasiya dinambe yagoya manan gwahade po bulun hamin. Irkeb sanjinminbe sanjin hen han kanya agat urde han yen go gwahade mon, kidomak hirin. Ningeb nanan fay bana gon nanan kenkela ma temeyde hinhin, kidomak po hinhin. Wawun wor gagasiya dinam-beya kenkela ma temeyde hinhan, kidoma bulun po hinhin.

¹³ Be, go kamereb buntulun kura nanan kota

hende hoyañ foy teñ hike kinmiriñ. Buntulun gore hokde po, “Mata kafuram wor po! Mata kafuram wor po! Al Kurunyen miyon hoyañ karwo hañ gore bigulmiñ fu yirkeb mata alya bereya megen hañ mar hitte forok yenayiñ gobe kafuram wor po!” yiriñ.

9

¹ Be, go kamereb Al Kurunyen miyon 7 bana goñ siptesoñonmiñ belen bigulmiñ fu iryiñ. Irkeb dinambe kura bikkeñ nanñinñde mat megen katyiñ goyen kinmiriñ. Dinambe gobe mete dukun wor po kimyan miñmon bana goñ kurkun kurkun yame hol ird irdde niñ ki untiñ. ² Irkeb dinambe gore mete dukun wor po bana goñ kurkun kurkun yame hol iryiñ. Irkeb kaki belen kak tupi kurunñde mat kaki wañ hiyen go gwahade goyen pul yeñ wayyiñ. Mete dukun wor po bana mat kaki watiñ gore naña diliñya nanñinñya pet tike kidoma hiriñ. ³ Irkeb gusu budam wor po kaki bana mat megen kateñ hinhan. Gusu gobe misiñ kalpañ belen al yiseñ hanñen gote tareñ yara yuntiñ. ⁴ Gusu gobe yamuñya busa asañyabe he yago megen hañ goyen bulun ma yirnayiñ yintiñ. Gega alya bereya Al Kurun belen kimiñde soñ ma yirtiñ mar go po ga yisinayiñ yintiñ. ⁵ Goyenpoga gusu gobe al yisike kamde kamde sañiñ ma yuntiñ. Yisike gagasi siptesoñon bana uliñ misiñ kurun po kattede tareñ po yuntiñ. Uliñ misiñ bulun po katnayiñ gobe misiñ kalpañ kura gore al yisike misiñ bulun po nurde hanñen go gwahade goyen. ⁶ Gusu belen yisike gagasi siptesoñon uliñ misiñ bulun po kateñ hinayiñya gobe kamde kamde niñ

wor po nurde hinayiñ gega ma kamnayiñ. Mel gobe kamtek wor po yirde hiyeñ gega, kamde kamde belen yeneñ yilwa yiryen.

⁷ Be, gusu gobe fulenare kuñ kuñ niñ hos yara gitik yirtin yinmirin. Gusu go tonan hendebe det kura doyan al kurunyen tonanhor gol belen po yirtin goyen hor yirtin hinhan. Irde dinsokbe alyen yara yinmirin. ⁸ Irde tonan yuwalhenbe sobam bereyen yara hinhan. Irde misinbe dapña kafuram wor po kura laion gote misin yara yinmirin. ⁹ Irde dumundebe dari mala pet ten tenen niñ det ain parwek goyen yirtin. Irde foy ten kuñ hike tapen gote migirinbe kurun wor po. Migirin gobe fulenare niñ nima hos belen yulun ten hanyen budam wor po fulenare kuñ hike naña migirin kurun wor po forok yen hanyen go gwahade goyen. ¹⁰ Gusu buda gobe gifirin manan, irde gifirin murunde gorbe misin kalpan gote misin hinhan. Gifirin murunde gorbe al yisike gagasi siptesonon ulin misin kattek sanin minyan. ¹¹ Be, gusu goyen doyan yird yird al kura hinhan. Al gobe Satanyen miyon, mete dukun bana wor po mat watin al. Denembe Hiburu mere mat Abadon, munan Grik mere matbe Apolion.*

¹² Be, mata kafuram mehen de niñ wor pobe gago fole tike hubu hihi. Mata kafuram irawabe kame forok yeren tahar.

¹³ Be, Al Kurunyen miyon 7 bana gon 6min gore bigulmin fu iryin. Irkeb Al Kurun galak ird ird alta gol belen po irde Al Kurun dilin mar hitin

* **9:11:** Abadonya Apolionyat minbe gwamun yurd yurd al.

gote muruŋ sipte kurhan kurhan goŋ hirkam hinhande matbe al melak kura forok yeke nurmiriŋ. ¹⁴ Al melak gore miyoŋ gayamuŋ ga bigul fu iryiŋ goyen, “Satanyen miyoŋ sipte Yufretis fe bana fere yirtiŋ goyen yad siŋa yirayiŋ,” inyiŋ. ¹⁵ Irkeb Al Kuruŋyen miyoŋ gore Satanyen miyoŋ sipte fere yirtiŋ koyare hinhan goyen yad siŋa yiryiŋ. Miyoŋ sipte gobe koyare heŋ heŋbe megen niŋ alya bereya pota yirde buda karwo yirtiŋ bana goŋ buda uŋkureŋ gasa yirke kamnayiŋ yeŋ nalu kirtiŋ goyen forok yekeb gogo yad siŋa yiryiŋ. ¹⁶ Be, fulenŋa mar hos hende kuŋ hinhan gobe 200 milion gwahade yeke nurmiriŋ.

¹⁷ Be, hosya go hende kuŋ hinhan marya goyen yuwarwarte yinmiriŋbe gahade: dari mala pet teŋ teŋde niŋ det ain parwek dumuŋde yirtiŋ gobe bukkeŋhel yitiŋ, irde kurabe digulakya halkeŋya muŋ kura suluk irtiŋ, irde kurabe wul-sakkeŋ salfa hora gwahade yara yirtiŋ. Hos gote tonanbe laionyen tonan yara. Mohonde matbe kak, kakiya salfa hora uka wor po heŋ buk yitiŋya goyen waŋ hike yinmiriŋ. ¹⁸ Hos go mohonde mat det buluŋ karwo kak, kakiya salfa hora uka wor po heŋ buk yitiŋya gore alya bereya megen haŋ goyen budam wor po gasa yirke kamamiŋ. Kamamiŋ mar gobe megen niŋ al tumŋaŋ pota yirde buda karwo heke buda uŋkureŋbe gasa yirke kamnayiŋ go gwahade goyen. ¹⁹ Hos gote tareŋbe mohonŋya gifiriŋya goyenter hinhin. Gifiriŋbe kunere yara, irde muruŋ belenbe kunere tonan miŋyaŋ ala. Gifiriŋ gore al gasa yirde dagim yaŋ yirde hinhan.

²⁰ Be, alya bereya det bulun karwo kak, kakiya salfa hora buk yitiŋ hos mohonɗe mat waŋ hinhan gore ma gasa yirke kamamiŋ mar gobe yiŋgeŋ mata bulun teŋ hitiŋ goyen yubul ma teŋ Al Kurunŋ niŋ biŋ mulgaŋ ma hamiŋ. Go mar gobe unɗura doloŋ yird yird mataya det toneŋ gol, silwa, baras, horayab heya beŋ po yirtiŋ goyen doloŋ yird yird mataya goyen bada ma hamiŋ. Det toneŋ gobe epte ma nanɗkenniŋ, mere ma nurnayiŋ, irde kuŋ waŋ ma tinayiŋ gega, Al Kurunŋniŋ yeŋ nurde doloŋ yirde hanɗen. ²¹ Irde al gasa yirke kamde kamde mata, merebal kurayen kurayen, leplep matayabe kawe mataya teŋ haŋ goke Al Kurunŋ pohogay irde yeŋ ge biŋ mulgaŋ ma hamiŋ.

10

Al Kurunɗen miyoŋ kuraya asaŋ bili irtiŋ dirɗeŋ kura goya

¹ Be, go kamereb Al Kurunɗen miyoŋ hoyan kura tareŋmiŋ kurunŋ wor po gore Al Kurunɗen gasunɗe mat megen kateŋ hike kinmiriŋ. Yeŋbe kigariŋkiŋ faykek wor po beŋ aw urtiŋ, irde gamatsawbe tonan hende hinhin. Tonan hende hinhin goyenbe tonan sisan ma urde hinhin. Kimiŋbe naŋa timiytiŋ yara agat urde hinhin. Irde kahanbe hora beŋ po tola yirtiŋ humga kuŋ buk yeŋ hanɗen go gwahade hinhin. ² Haniŋdebe asaŋ sobam bili irtiŋ dirɗeŋ kura goyen digiltiŋ hinhin. Irde kahan yasebe makaŋ alare huwardeb kahan tapabe siŋa fudiŋde huwariŋ. ³ Irdeb laion beŋ mere kurunŋ po teŋ hanɗen

yara kuware wor po mere tiyyin. Gwaha tike gab daga 7 mere tiyamin. ⁴ Daga 7 mere tikeb ne belen meremin goyen asanɗe kayen timirin. Gega al melak kura forok yenɓe, “Daga 7 mere tahaɗ goyen goya ma kayayin, mere gobe banare po hinayin,” ninyin.

⁵ Be, Al Kurunyen miyon makan alareya megenya huwarde hike kinmirin gore Al Kurun palap ire yen hanin yase isan hiri. ⁶ Irdeb Al Kurun deɗe urdeb biɗa sanin po tiyyin. Al Kurun, huginɗen hiyen al, nanɗin, megen, makaɗyabe det kurun gayen yirin al gote deɗe urde biɗa tenyabe, “Al Kurun belen dufaymin bikken kiryin gote iginenɓe heɗ ga moɗ forok yiyyen. Nalu singir singir ma iryen! ⁷ Goyenpoga Al Kurunɓe mere basan marmin yinyin gwahade goyen po, miyonmin 7 bigul yawaramin bana goɗ funamin belen bigulmin fu irke gab Al Kurun belen dufaymin kiryin banare hitin gote iginen kawan forok iryen,” yirin.

⁸ Irkeb al melak kura nanɗinɗe mat hanɗapya nurmirin gore sopte po gahade ninyin: “Al Kurunyen miyon makaɗya megenya hende huwarde hi gote haninɗe asan digiltin hi goyen kun tawa,” ninyin.

⁹ Irkeb nebe Al Kurunyen miyon go hitte kunɓe asan goyen nuni yen gusunan irmirin. Irkeb miyon goreb, “Asan ga ten nawa. Gabe mo-hongerbe yalanɗu finin hapek yan go gwahade nurayin gega, bege bana kurkunɓe beger tigiri tiyyen,” ninyin. ¹⁰ Irkeb asan dirɗen goyen Al Kurunyen miyon gote haninɗe mat tenɓe nimirin.

Ten nemeke mohonnerbe yalanu fimiŋ yara hapek yaŋ nurmiriŋ gega, nukuluk urmekeb kurkuŋ benerbe tigiri tiyiŋ. ¹¹ Gwaha timekeb al melak gore, “Gebe alya bereya, naŋa karkuwaŋ, merem hoyan hoyan, irde megen niŋ doyaŋ mar karkuwaŋbe kame dahade hinayiŋ goke Al Kurunyen mere basaŋ heŋ tagalayin,” ninyiŋ.

11

Al Kurun niŋ tagal tagal al irawa

¹ Be, go kamereb det kurayen kurayen karkuwaŋmiŋ dahade goyen tuŋaŋ ten ten de niŋ kutum kura nunenbe gaha ninyiŋ: “Kuŋ Al Kurunyen ya balemya Al Kurun galak ird ird altaya gote kurunmiŋ tuŋaŋ tiyayiŋ. Irde ya balem bana goŋ Al Kurun dolon irde haŋ mar goyen kapyan hawayiŋ. ² Goyenpoga Al Kurunyen ya balem koya kirtiŋ bana goyen siŋak beŋ matbe sawsawa kura gabu ird ird gasuŋ hi gobe tuŋaŋ ma tiyayiŋ. Gasuŋ gobe al miŋ hoyan Yuda mar moŋ goyen waŋ gabu irde hanyen gasuŋ geb gago diniŋ hime. Go mar gore gagasi 42 gayen Yerusalem taun Al Kurun diliŋde wukkeŋ keneŋ hiyen goyen ufurka ten buluŋ buluŋ irnayiŋ. ³ Nebe ne niŋ ten tagalde hiriryen al irawa kura saŋiŋne yunenbe yad yermeke wayiryen. Waŋbe amil kerkek hor irdeb merene basaŋ heŋ naŋa fay 1,260 gwahade goyen tagalde hiriryen” ninyiŋ.

⁴ Be, Al Kurun niŋ mere ten ten al irawa gobe olip he irawaya hulsi irawaya Doyaŋ Al Kurun diliŋ mar huwarde haryen go goyen. Doyaŋ

Al Kurun̄ gobe alya bereya megen hañ kurun̄ gate Kurun̄miñ. ⁵ Al irawa goyen al kura beļeñ bulun̄ yirniñ yeñ tun̄aṅ yurnayiñbe al irawa gote moħon̄de mat kak forok yeñ asogom mugol kiryeñ. Al kura irem go bulun̄ yirniñ yeñ tun̄aṅ yurnayiñ marbe gwaha mat kamnayiñ. ⁶ Irem gobe Al Kurun̄yen mere basan̄ heñ tagalde hen̄ya kigariñ goya kateñ ma yeñ nan̄kiñ pet teñ teñ tareñ miñyañ. Irde fe kurun̄ gayen yigiri tike dari hetek san̄iñ wor go miñyañ. Irde mata kafuram al bulun̄ yirtek goyen kurayen kurayen forok yirde alya bereya megen hañ gayen igiñ gwamuñ yurtek tareñ wor go miñyañ. Irem gobe gwaha yirye yeñbe igiñ gwahade po yirtek san̄iñ miñyañ hinaryum.

⁷ Be, irem go Al Kurun̄yen mere tagalde pasi hekeb dap̄a kafuram kura mete dukun̄ wor po kimyañ miñmoñ bana goñ mat watiñ gore irem goya arnayiñ. Irde irem go fole yirde gasa yirke kamiryen̄. ⁸ Irkeb irem go kamtiñ hakwambe taun kurun̄ Yerusalem bana goñ niñ beļeñ kurun̄de gor yubul tike hiriryen̄. Taun gokeb Sodom yara ma Isip yara yeñ hanyen̄ gogo. Taun goyenterbe bikken̄ al irawa gote Doyan̄ Al Kurun̄ wor mayke kamiñ. ⁹ Irkeb nañ a karkuwan̄ karkuwan̄, al miñ kurayen kurayen, meremiñ kurayen kurayen, irde sikken̄ um̄a kurayen kurayen niñ alya bereya beļeñ irem gote uliñ hakwam wawun̄ karwoya nañ a fay sipteya goyen belen̄ yubul titiñ yennayiñ. Irde hakwam goyen mete teñ teñ niñ piñeñ henayiñ. ¹⁰ Megen hañ marbe tum̄aṅ irem go kamke ayañ yerdeb

detmiɲ yinɲen uliɲ muruɲgem moɲ duliɲ kadom gunenɲ tinayinɲ. Al Kurunɲen mere basanɲ mar irawa gore megen niɲ mar kanduk kurunɲ forok ird yunke biɲ misiɲ nurde hinayinɲ geb, irem go kamkeb gogo amanɲ henayinɲ.

¹¹ Be, nanaɲ fay sipteminɲde nanɲkahal hekeb al yisanɲ heɲ heɲ meɲe Al Kurunɲ hitte mat katenɲ irem go biɲde hurkukeb sopte gerenɲ heɲ huwararyum. Irkeb alya bereya tumɲanɲ irem go yenenɲbe kafura wor po haminɲ. ¹² Irkeb al melak kura kurunɲ wor po nanɲkinɲde mat, “Hende gar wayyi” yeke Al Kurunɲen mere basanɲ mar irawa gobe nuraryum. Nurdeb asogom belenɲ yenenɲ hikeya Al Kurunɲen gasunɲde kigarinɲkinɲ faykek hende hurkaryum. ¹³ Goya goyenbe nininɲa kurunɲ wor po forok yirinɲ. Irkeb Yerusalem taun go bulunɲ hiriɲ. Bulunɲ hiriɲ gobe taun goyen walka tenɲ 10 irde unɲkurenɲbe bulunɲ hiriɲ go gwahade goyen. Bulunɲ hiriɲ bana gonɲbe 7,000 alya bereya kamaminɲ. Go ma kamaminɲ marbe kafura wor po heɲ Al Kurunɲ tarenɲmiɲ kurunɲ wor po goyen denem turɲunɲ yanɲ iraminɲ.

¹⁴ Be, mata kafuram kahalte ninɲbe gogo hubu hiriɲ. Gega mata kafuram hoyanɲ funanɲ kar-wominɲbe heɲ ga ma wayenɲ tiya!

¹⁵ Be, Al Kurunɲen miyonɲ 7 bigul yawaraminɲ bana gonɲ miyonɲ funanɲ belenɲ bigulmiɲ fu iryinɲ. Irkeb al melak budam kurunɲ wor po nanɲkinɲde mat forok yenɲbe, “Gayenter alya bereya megen hanɲ kurunɲ gayen doyanɲ yird yird sanɲinɲbe Doyanɲ Al Kurunɲya yenɲ belenɲ basinɲa irtinɲ al Mesaiayat haninɲde hi. Yenɲ belenɲ gwahader doyanɲ yirde

hiyen!” yamin. ¹⁶ Irkeb Al Kurunyen alya bereyat doyan marte parguwak 24, Al Kurun dilin mar keperde hinhan gore wulgurut yen kiminbe megen yirde Al Kurun doloŋ iramin. ¹⁷ Gwaha irde hejyabe,

“Doyan Al Kurun, gebe Al Kurun, tareŋge kurun wor po.

Gebe bikken hinhan, gayenter wor ha.

Gebe saŋinŋe kurun goyen teŋ alya bereya doyan yird yird meten miŋ urarin.

Ninŋeb goke iŋin wor po nurd gunen hite.

¹⁸ Ge ma nurd gunen haŋ mar belen ge nin bin ar yen hinhan.

Gega bege ar yetek nalube gago forok yihi.

Al kamtiŋ merere huwartek nalube gago forok yihi.

Meten marge, merege basan heŋ heŋ mar, alya bereyage, irde palap girde haŋ mar tumŋan matamin gote murunŋem yunen yunen nalube gago forok yihi.

Al denem yan ma al denem moŋ goyen tumŋan murunŋem yunen yunen nalube gago forok yihi.

Alya bereya megen haŋ kurun gayen bulun yiramin mar goyen mugol kertek nalube gago forok yihi!” yamin.

¹⁹ Be, Al Kurunyen ya balem gasunminde hi gote yame fegelke hol yirin. Irkeb bana goŋbe Al Kurunyen Biŋa teŋ teŋ Bokis hike kinmirin. Irkeb dagamel teŋ daga katen hururun teŋ hinhin. Irde nininŋa forok yeke kigarin hora yara hitin goyen kurun po katyin.

12

Bereya asogomiŋ deregonya

¹ Be, gwaha tikeb mata tijeŋ kura matamneŋ nanŋiŋde forok yiriŋ. Mata gobe gahade: bere kura naŋa diliŋ teŋ amil hor irtiŋ yara irde gagasi hende huwartiŋ hinhin. Irde dinambe 12 belen doyaŋ alyen tonanhor irtiŋ goyen teŋ tonanđe hor irtiŋ hinhin. ² Bere gobe biŋ miŋyaŋ, irde diriŋ kawaŋ kere yeŋ uliŋ misiŋ kurun kateŋ eseŋ hinhin. ³ Irkeb nanŋiŋde mata hoyan kura forok yiriŋ. Mata gobe gahade: deregon kurun miliŋ wor po sikkenbe bukken, irde tonan 7 miŋyaŋ goyen forok yiriŋ. Tonan 7 gobe doyaŋ al karkuwanđe tonanhor 7 goyen tonan 7yan goyaŋ yirtiŋ ala hinhan. Deregon gobe hirkam 10 miŋyaŋ. ⁴ Deregon gobe siŋgili teŋ naŋa kor irtiŋ yara gifiriŋ temeyde dinambe kwer yurke budam wor po wok yeŋ megen katamiŋ. Dinambe katamiŋ gobe nanŋiŋde dinambe kurun goyen tumnan buda karwo yirde unjkurenbe wok yeŋ katnayiŋ go gwahade goyen tiyamiŋ. Be, deregon gobe bere gore diriŋ kawaŋ kerkeb goyare po diriŋ go neweŋ yeŋ bere go diriŋ kawaŋ kereŋ teŋ hinhin gote kimiŋ mat pet teŋ hinhin. ⁵ Be, bere goyen diriŋ al diriŋ kawaŋ kiryiŋ. Diriŋ gobe doyaŋ alyen kutum ain belen po irtiŋ goyen tanarde naŋa karkuwan karkuwan tumnan doyaŋ yiryen albe gogo. Niŋgeb deregon gore diriŋ go niyyenkek yeŋbe bere gote diriŋ goyen araŋ po teŋ Doyaŋ Al Kurunen keperd keperd gasuŋ Al Kurun keperde hinhide gor tukuke gor hinhin. ⁶ Be, bere gobe busahardeb

sawsawa po kurunɓa naɓa bana goɗ gasunɓa kura Al Kurunɓa beɓeɓe bere goke teɓ gitik irtinɓe gor kurinɓa. Gasunɓa gobe Al Kurunɓa beɓeɓe bere goyen naɓa fay 1,260 gahade doyanɓa irde paka ireɓe yeɓe bikken gitik iryinɓa go goyen.

⁷ Be, Al Kurunɓa gasunɓa fulenɓa kurunɓa forok yirinɓa. Al Kurunɓa miyonɓa doyanɓa alminɓa Maikelya beɓeɓe deregon goya yende miyonɓinɓa araminɓa. ⁸ Goyenpoga deregon gobe Al Kurunɓa miyonɓa epte fole yirtek tareɓ minɓonɓa geb, deregon goya miyonɓinɓa be Al Kurunɓa gasunɓa mat yakira tikeb gasunɓa minɓonɓa haminɓa. ⁹ Be, deregon gobe takira tikeb megen katyinɓa. Deregon gobe kunere bikkenɓa hinɓin go goyen. Gobe deɓem kurabe Unɓura, kurabe Satan inenɓa hanɓen. Yeɓe beɓeɓe alya bereya megen hanɓa kurunɓa gayen usi yirke mata bulunɓe kateɓ hanɓen. Deregon go temeyke megen katyinɓa be miyonɓinɓa yago mananɓa tumɓanɓa kataminɓa.

¹⁰ Be, go kamereb al melak kurunɓa wor po nanɓinɓe mat forok yeke nurmirinɓa. Merebe gahade: “Kadninɓa merem yanɓa yird yird al gobe gogo takira tike megen kata. Huginɓa wawunɓa nanɓahalya Al Kurunɓa hitte kadninɓa merem yanɓa yirde hiyen al gobe teɓ temeyke megen kata. Ninɓeɓe gayenterbe Al Kurunɓaninɓa beɓeɓe alya bereya yumulɓanɓa tiyenɓa. Al tumɓanɓa yende tareɓ bana hinayinɓa. Yeɓe beɓeɓe doyanɓa yird yird nalube gago forok yihi. Mesaia Al Kurunɓa beɓeɓe basinɓa iryinɓa al gote sanɓinɓa mananɓa forok yihi. ¹¹ Mel gobe Sipsip dirɓenɓa gore darim wok irde kaminɓa go hende huwarde al bulunɓa go fole irtinɓa. Irde

mere fudinde po kawan tagaldeb al bulun go fole irtin. Ningeb mel gobe mudunke kamnin wor igin ala yen nurde ga hinhan. ¹² Ningeb den Al Kurunyen gasunde han mar tumnan aman henayin. Goyenpoga den megenya makanjabe Satan den hitte kurka geb, goke kafuram wor po nurde dunhem. Yenbe nalu uyande ma hiyen goyen nurde hi geb, goke bin ar wor po yen hi,” yirin.

¹³ Be, deregon go Al Kurunyen gasunde mat ten temeyke megen katyin goyen bebak tiyyin. Irdeb dirin al dirin kawan kiryin bere goyen bulun bulun ire yen nankenen kun hinhin. ¹⁴ Bere gobe sawsawa po kurun nanba bana gon gasun kura Al Kurun belen gitik irde untinde gor foy ten kun kun nin buntulun kurun wor po gote tapen irawa untin. Gasun gobe bere goyen gor dama karwo irde gagasi 6 gayen gor po hike deregon gore epte ma bere goyen bulun iryen yen Al Kurun belen gitik iryin go goyen. ¹⁵ Be, deregon goyen po goyenbe kunere kurun gogo. Goreb bere goyen figilu tiwi yen mohanje mat fe kurun wor po fur tiyyin. ¹⁶ Gega megen belen bere go faran urde mohan an irde fe fur tiyyin kurun goyen nen pasi hirin. ¹⁷ Irkeb deregon gobe bin ar wor po yeke bere gote dirinmin yago go ma kamamin megen han goya arnin yen kurin. Go mar gobe Al Kurunyen saba gama irde Yesu nin yitin mere fudinde goyen kawan po tagalde hanjen mar go goyen. ¹⁸ Be, deregon gobe makan ferende huwaryin.

13

Dapɲa kafuram kura irawa forok yaryum

¹ Be, yeɲ gor huwarde hike dapɲa duwi kafuram wor po kura makaɲ alare mat forok yeke kinmiriɲ. Dapɲa gobe hirkam 10 miɲyaɲ, irde tonanɲbe 7 miɲyaɲ. Hirkam go hendebe doyaɲ alyen tonanɲhor hor yirtiɲ ala hinhan. Irde tonanɲ 7 go hendebe Al Kurunɲ sukal irtiɲ deɲe goyaɲ katiɲ ala hinhan. ² Dapɲa duwi kafuram gobe dapɲa kura lepat ineyɲ hanyen goyen yara kinmiriɲ. Goyenbe kahanɲbe dapɲa kura bea ineyɲ hanyen gote kahanɲ yara, irde mohonɲbe laion mohonɲ yara kinmiriɲ. Be, deregon gore dapɲa kafuram goyen sanɲiɲmiɲ unyiɲ. Irdeb deɲe kurunɲ uneyɲbe doyaɲ al kurunɲ iryiɲ. ³ Goyenbe dapɲa duwi kafuram gote tonanɲ 7 goyen unɲkurenɲ kurabe kamtek ge mayamiɲ gega, geren hitiɲ goyen kinmiriɲ. Alya bereya megen hanɲ kurunɲ gore keneɲbe tonɲeyɲ yaɲ wor po yeɲ nurd uneyɲbe gama iramiɲ. ⁴ Albe deregon gore dapɲa duwi kafuram goyen doyaɲ al iryiɲ goke deregon goyen doloɲ iramiɲ. Irde dapɲa duwi kafuram goyen wor doloɲ irdeb, “Ganunɲ al beleɲ epte dapɲa duwi kafuram gahade hiyyeyɲ? Irde ganunɲ al beleɲ epte yeyɲa ariryeyɲ? Hubu wor po!” yamiɲ.

⁵ Be, dapɲa duwi kafuram gobe yiɲgenɲ ge turunɲ turunɲ teɲ, Al Kurunɲ sukal ird ird tareɲ untiɲ. Irde doyaɲ al heɲ dama karwoya gagasi 6ya gayen meteyɲ teɲ teɲ sanɲiɲ untiɲ. ⁶ Irkeb dapɲa duwi kafuram gore mohonɲ anɲ irde Al Kurunɲ mere bulunɲ mat irde Al Kurunɲyen deɲemya gasunɲmiɲya

irde gasunminj bana han marya goyen nanyan yiriyin. ⁷ Yenbe Al Kurunyen alya bereya goya arde fole yirtek sanjin untin. Irde alya bereya min kurayen kurayen, sikken umna kurayen kurayen, mereminj kurayen kurayen, irde nana karkuwan karkuwan kurun goyen doyan yird yird taren untin. ⁸ Irkeb alya bereya megen han kurun gore dapna duwi kafuram goyen dolon irnayin. Go mar gote denembe tumnan Al Kurunya huginjen hitek marte denem nankinya megenya ma forok yekeya katinj asanj goyen bana ma han. Asanj gobe al belen mayke kamyin al Sipsip dirnenj gote asanj.

⁹ Ningeb al kirminj yanbe merene gayen nurde bebak tinayin. ¹⁰ Al kura fere ten koyare yerke hinayin yen Al Kurun belen dufayminj kirtin marbe koyare hinayin. Munan al kura fulenare nin bidilare gasa yirke kamnayin yen Al Kurun belen dufayminj kirtin marbe gwaha mat po kamnayin. Ningeb Al Kurunyen alya bereyabe kanduk forok yenayin kurun goyen goke mukku ma ten taren po hen hen ge pinen ma hen hinayin. Irde Al Kurun nin hekenj nurtin goyen sanjin po tanarde hinayin.

Dapna duwi kafuram hoyan kura forok yirin

¹¹ Be, alya bereya megen han gore dapna duwi kafuram goyen dolon irde han goyen kinmirin go kamereb dapna duwi kafuram hoyan kura wor megen bana mat forok yeke kinmirin. Yenbe sipsip dirnenj yara hirkam irawa minyan hinhin. Mereminbe deregonyen mere yara tiyyin. ¹² Yenbe yingen ge ten dapna duwi kafuram mehenje watinj gore sanjin tirin

goyen tenbe meten tiyyin. Irdeb megenya alya bereya megen han goyen yinkeb dapna duwi kafuram mehenđe nin goyen dolon iramin. Dapna kafuram mehenđe nin gobe bikken kamtek ge maytin gega geren hirin go goyen. ¹³ Dapna kafuram kame wayyin gobe mata tinen turun yan wor po forok yirinin. Kurabe al belen dilinde kawan po kenen hikeya yen belen irke nankinde mat kak megen katyin. ¹⁴ Yenbe dapna kadom mehenđe wayyin gote dilin mar mata tinen turun yan forok yirdeb go hende huwarde alya bereya megen han kurun gayen usi yirinin. Irde dapna duwi kadom kafuram fulenare nin bidilare dagim yan irtin gega go ma kamiyin goyen turun ird ird ninbe dapna gote tonein irnan yinin. ¹⁵ Yenbe dapna duwi kadom kafuram mehenđe wayyin gote tonein irtin goyen binfut minyan ird ird sanin untin hinhin. Gwaha irkeb tonein irtin gore binfut irde mere tiyyin. Gobe alya bereya det goyen dolon ird ird nin igin ma nurde dolon ma iramin mar goyen tumnan gasa yirke kamnayan yenbe gogo menemin fu iryin. ¹⁶ Irde dapna duwi kafuram kame wayyin gobe al tumnan Satanyen alya bereya hitin gote hanin yasere wet ma kiminde wet son yird yird nin wor pakku yirinin. Al denem mon, al denem yan, horam yan mar, al siksuknen, irde al kurate meten marya yingende dufayde meten ten han marya tumnan hanin yase ma kiminde son yird yird nin pakku yirinin. ¹⁷ Gogab al kura haninde ma kiminde son yirtin goyen hubu kenem epte ma det damu tinayin, irde epte ma det yunke al

hoyan beley damu tinayin. Al haniy yasere kurab kimiñde soñ yird yird gobe dapña duwi kafuram gote denem, kurabe denem gote namba.

¹⁸ Niñgeb albe mata goyen keneñ igin bebak titek dufay wukken go miñyan ala hinayin. Al kura kenkela bebak teñ teñ tareñ miñyan al gobe tubul tike dapña duwi kafuram gote namba gote miñ bebak tinayin. Namba gobe al unñkuren kura gote namba. Nambamiñbe 666.

14

Sipsip al dirin dirinnya al 144,000ya

¹ Be, go kamereb Sipsip dirin beley Saion dondonde huwarde hinhin goyen kinmirin. Yenbe alya bereya 144,000 gote kimiñdebe Sipsip dirin gote denemya Naniñde denemya katin mar goya dugure gor huwarde hinhan. ² Irkeb migirin kurun kura nanñin mat forok yeke nurmirin. Migirin gobe fe hamulare solok yen migirin kurun teñ hiyen go gwahade goyen, irde daga katen hiyen go gwahade yara nurmirin. Gega migirin gobe kirminner igin wor po nurmirin. Tikin hen hen de nin det kura hap inen hanjen goyen kari yirde hike tikin forok yen hiyen gwahade yara nurmirin. ³ Hap goyen kari yiramin mar gore Doyan Al Kurunyen keperd keperd gasunya det binfut miñyan sipte goya Al Kurunyen alya bereyat doyan marte parguwakya gote dilin mar huwarde tikin gergen kura hamin. Tikin gobe Sipsip dirinnya hinhan mar 144,000 yen beley megen mat yumulgan titin gore po gab tikin go tunan urde tikin hetek hinhan. Al

hoyanbe epte ma gwaha titek hinhan. ⁴ Mel gobe bere hoyanya ma firtin gwahade goyen po, det toneŋ al beleŋ yirtin goyen dolon ma yirde Al Kurun dilinde wukken hitin mar go goyen. Go mar gobe Sipsip dirnen goyen huginen gama irde han. Yenbe megen han mar go bana gon mat basina yirde det damu titin yara Yesu darim wok irde kamyin gore yumulgan titin. Irdeb meten gergende nin bingge mehende yawartin goyen Al Kurun galak irde han yen yara mel goyen Al Kurunya Sipsip dirnenya hitte galak yirtin. ⁵ Mel gobe usi mere kura ma titin, irde ulinde mere minmon hinhan.

Al Kurunen miyon karwo beleŋ mere tagalamin

⁶ Be, go kamereb Al Kurunen miyon hoyan kura nana kota foy ten hike kinmirin. Yenbe megen han mar hitte Yesu nin yitin mere gwahader hitin goyen momon yirtek minyan hinhin. Yen beleŋ nana karkuwan karkuwan, al min kurayen kurayen, meremin kurayen kurayen, irde al sikken kurayen kurayen goyen momon yirtek mere igin minyan hinhin. ⁷ Be, miyon gore kuware po, “Al Kurun beleŋ alya bereya tumnan merere yertek nalu binde hihi geb, kafura irde denem turnun yan irnayin. Nan kin, megen, makanyabe fe dilinya forok yiryin al goyen dolon irnayin,” yirin.

⁸ Be, gwaha yekeb Al Kurunen miyon hoyan beleŋ kadam go gama irdeb, “Babilon taun kurun wor po gobe gwamuŋ urtin! Bulun wor po hitin! Babilon gore alya bereya nana karkuwan

karkuwan bana han mar goyen nene kukuwa wor po hetek wain yuni. Wain gobe leplep matamin go goyen,” yiri.

⁹ Be, gwaha yekeb Al Kurunyen miyon hoyan kura gore kadam irawa goyen gama irde kuware po gaha yiri: “Al kura dapna duwi kafuramya gote tone irtin goya goyen dolo yirde kiminde ma haninde dapna duwi gore nere yen basina yirde denem son yirtin marbe ¹⁰ wain sanin wor po nene garbam bulun po hen hanen yara Al Kurunyen bearar kurun po kennayin. Go mar goyen hittebe Al Kurunyen beararin kurun wor po fe wogortin yara irde yunen. Irkeb go mar gobe Al Kurunyen miyon yago wukken wor poya Sipsip dirnenya dilin mar hen salfa hora humga kun hi gore yisike ulin misin kurun wor po katen hinayin. ¹¹ Go mar go kunga yirde hiyen kak gote kakimbe gwahader wan hurkun hiyen. Ningeb al kura dapna duwi kafuramya gote tone irtin goya goyen dolo yirde han mar, irde haninde ma kiminde dapna gote denem son yirtin marbe usanen mon wawunya nan kahalya huginen ulin misin katen hinayin,” yiri. ¹² Ningeb Al Kurunyen alya bereya sabamin gama irde Yesu nin heken nurd nurd mata ma tubul titin maryabe kanduk budam yenen goke mukku ma ten taren po hen hen ge pinen ma hen hinayin.

¹³ Be, Al Kurunyen miyon karwo gore mere tiyamin go kamereb al melak kura nan kinde mat gaha yiri: “‘Gayenter mat al kura Doyan Al Kurun nin ten kamnayin marbe Al Kurun belen guram yirde sanin yiryen,’ gwahade kaya,” yiri.

Irkeb Holi Spirit belenbe, “Fudinde, mel gore Al Kurun niŋ meten tahan gote iginenbe kawan forok yenayin geb, mel gobe meten taren po ten hitin goyen yubul ten usan hen hinayin,” yirin.

Megen binŋe ep hitin yad yad nalu forok yirin

¹⁴ Be, go kamereb delne mar kigarinŋin faykek wor po forok yeke kinmirin. Kigarinŋin go hende al kura Al Urmin yara goyen keperde hinhin. Tonanbebe doyan al kurunyen tonanhor gol belen po irtin goyen hor irtin, irde wit sak yeke walde walde bidila goyen haniŋde hike kinmirin. ¹⁵ Be, Al Kurunyen miyon hoyan kura belen Al Kurunyen ya balem bana mat sinare katen kuware po kigarinŋin faykek hende kipirtin hinhin al goyen inyin. “Wit sak yen yen nalu forok yeke bidila ten walde yad buda yirde hanen yara, megen niŋ mar yad yad nalube gago forok yihi geb, alya bereya ge belen yawartekbe yawara,” inyin. ¹⁶ Gwaha inkeb kigarinŋin faykek hende keperde hinhin al gore bidilamin temeyde walyin. Alya bereya megen han goyen yawaryin.

¹⁷ Be, go kamereb Al Kurunyen miyon hoyan kura Al Kurunyen gasunminde niŋ ya balem bana mat sinare katyin. Yen wor bidila yaltin kura haniŋde manan katyin. ¹⁸ Irkeb Al Kurunyen miyon hoyan kura sopte Al Kurunyen ya balem bana kak doyan irde hiyen gore Al Kurun galak ird ird altare mat wanbe bidila go tanarde hinhin miyon goyen kuware po inyin. “Wain iginenbe fin hahan geb, bidilage misin yan go ten megen niŋ wain metenŋe gor kurkun wain iginen walde yawara,” inyin. ¹⁹ Irkeb miyon gore bidilamin

goyen temeyde wain iginenɛ beɛekde walde yade wain gilyanɛ heɛ heɛ gasuɛde yiryiɛ. Wain gilyanɛ heɛ heɛ gasuɛ gobe Al Kurunyen bearar go goyen. ²⁰ Niɛgeɛ wain iginenɛ gilyanɛ heɛ heɛ gasuɛ taun siɛare hiyen goyenter yukuɛ gilyanɛ hitiɛ yara Al Kurunɛ ma nurd unenɛ haɛ mar go gilyanɛ heɛ heɛ gasuɛde gor yerde karka tikeɛ darimbe figilu yara kateɛ 300 kilomita gisaw wor po kutiɛ. Dari beleɛ figilu yara hitiɛ gote dukunɛmiɛ tunɛɛɛbe megen mat hurkuɛ hos gote pukiɛ al keperde hanɛyende go gwahader hiriɛ.

15

Al Kurunyen miyoɛ 7 beleɛ mata kafuram 7 forok yiramɛɛ

¹ Be, go kamereɛ mata turɛunɛ yaɛ wor po hoyan kura nanɛkiɛde forok yeke kinmiriɛ. Mata gobe gahade: Al Kurunyen miyoɛ 7 beleɛ mata 7 kafuram wor po tiyamiɛ. Mata kafuram gabe Al Kurunyen bearar funaɛ wor po goyen forok yetekbe gago. ² Be, go kamereɛ makaɛ ala galas beleɛ po irtiɛ goya kakya suluk yirtiɛ goyen kinmiriɛ. Irde al kura dapɛa duwi kafuramiya gote toneɛ irtiɛ goyabe deɛemde namba 666ya goyen fole yirtiɛ marbe makaɛ siɛare huwarde hike yinmiriɛ. Mel gobe tikiɛde niɛ det hap inenɛ hanɛyen Al Kurunɛ beleɛ yuntiɛ goyen yanartiɛ hinhan. ³ Irdeɛ Al Kurunyen meteɛ al Mose beleɛ tikiɛ hitiɛ goyen hamiɛ. Sipsip dirɛɛɛ goke tikiɛ hitiɛ goyen manaɛ hamiɛ. Tikiɛ bilmiɛ gobe gahade:

“Al Kurun, gebe Doyan Al Kurun, tarenge kurun wor po.

Metengebe kurun wor po, irde turnun yan wor po!

Doyan Al Kurun, gebe gwahader hitin.

Matagebe fudinde, irde huwak wor po.

⁴ Doyan Al Kurun, ganun al beley kafura ma girnayin?

Ganun al beley denge turnun yan ma girnayin?

Ge po ga wukken wor po.

Matage huwak goyen alya bereya nana karkuwan karkuwan bana han mar goyen tunnan kennayin geb,

ge hitte po wan dolon girnayin,” yamin.

⁵ Be, go kamereb Al Kurunyen gasunde nin ya balem bana gon gasun himam goyen yamemin kawan po hol yeke kinmirin. ⁶ Be, ya balem bana gon mat Al Kurunyen miyon ⁷ gore mata ⁷ kafuram wor po goyen forok yirin yey sinare katamin. Miyon gobe amil sobam faykek wor po milmulken goyen hor yirtin hinhan. Irde gol beley po kan yara irtin goyen dumunde bili irtin hinhan. ⁷ Be, det binfut minyan sipte Doyan Al Kurunyen keperd keperd gasun milgu irtin hinhan goyen unkuwen kura beley kuwe gol beley po yirtin ⁷ goyen Al Kurunyen miyon ⁷ go yunyin. Kuwe ⁷ bana gonbe gwahader hiyen al Al Kurun gote bearamin fe makin yirtin yara hinhan.

⁸ Irke Al Kurunyen ya balem bana gonbe Al Kurunyen denem turnun yan wor poya sanjinmin kurun wor poya goyen kawan forok yird yird kaki beley makin hirin. Irkeb al kura epte ma

ya bana goṅ hurkutek hiriṅ. Ya balem bana goṅbe Al Kurunyen miyoṅ 7 gore mata kafuram 7 forok yirtek goyen hubu heṅ pasi yirke gab igiṅ hurkutek hiriṅ.

16

Al Kurunyen bearar gote kuwe 7

¹ Be, go kamereb al melak kura Al Kurunyen ya balem bana goṅ mat kuware po Al Kurunyen miyoṅ 7 goyen yinke nurmiriṅ. Meremiṅbe gahade: “Kunaṅ. Kuṅ Al Kurunyen bearar kuwe 7 bana haṅ goyen megen wogornaṅ,” yinyiṅ.

² Be, gwaha yinkeb miyoṅ meheṅde niṅ gore kuṅ kuwemiṅ goyen megen wogoryiṅ. Irkeb usu yeneṅmiṅ kafurama misinṅmiṅ buluṅ wor poya goyen dapṅa duwi kafuram gote deṅe uliṅde soṅ yirtiṅ marya dapṅa gote toneṅ dolonṅ irde hanṅen marya gote uliṅde forok yamiṅ.

³ Be, Al Kurunyen miyoṅ 7 goyen irawamiṅ beṅ kuwemiṅ makaṅ alare wogoryiṅ. Wogorkeb makaṅbe al kamtiṅde dari yara hiriṅ. Irkeb makaṅde niṅ dapṅa tumṅaṅ kamamiṅ.

⁴ Be, Al Kurunyen miyoṅ 7 goyen karwomiṅ beṅ fe karkuwanṅanya fe diliṅnyaṅ kuwemiṅ wogorke dari po hiriṅ. ⁵ Yeṅ beṅ gwaha tikeb Al Kurunyen miyoṅ kura fe doyaṅ yirde hiyen goreb gaha yeke nurmiriṅ: “Al Wukkeṅ wor po, gebe hakot hinhan, gayenter wor ha. Ge beṅ al merem yaṅ yird yird gobe huwak wor po. ⁶ Go yirha mar gobe gere alya bereya goya mere basaṅ margeya goyen gasa yirke darim wok yeṅ kamamiṅ. Goke teṅ ge beṅ go mar

goyen wolminen yirde dari nenan yen yunha gobe gwaha yirtek po yirha,” yirin.

⁷ Irkeb al melak kura Al Kurun galak ird ird altare mat forok yeke nurmirin. Mereminbe gahade: “Fudinde, Al Kurun, gebe Doyan Al Kurun, tarengembe kurun wor po! Ge beleñ merem yan yirde ha gobe fudinde mat yirde ha, irde huwak wor po ten ha,” yirin.

⁸ Be, Al Kurunyen miyon ⁷ goyen siptemin beleñ kuwemin nana diliñ hende wogoryin. Irkeb nana gobe tareñ po temeyde alya bereya kumga yirtek sanin miñyan hirin. ⁹ Be, alya bereya gobe nana gote uka bulun wor po gore kumga yiryin. Irkeb go mar gore mata kafuram gwahade goyen doyan yirde hi al Al Kurun goyen karan uramin. Irde mata bulunmin yubul ma ten Al Kurun nin bin mulgan ma hamin. Irde Al Kurun denem turnun yan ma iramin.

¹⁰ Be, Al Kurunyen miyon ⁷ goyen siptesononmin beleñ kuwemin dapna duwi kafuram gote keperd keperd gasun hende wogoryin. Gwaha irkeb dapna duwi kafuram gore alya bereyamin doyan yirde hiyen nana kurun gobe kidoma beleñ aw uryin. Irkeb mel gobe kanduknen wor po nurdeb melak yisamin. ¹¹ Irdeb ulin misin katen han goya usuminya goke ten Al Kurun saninmin kurun wor po goyen karan uramin. Irde mata bulunmin yubul ten yen ge bin mulgan hetek ma yiryin.

¹² Be, Al Kurunyen miyon ⁷ goyen 6min beleñ fe kurun Yufretis inen hanen go hende kuwemin wogoryin. Gwaha irkeb Yufretis fe kurun gobe

pet yiriñ. Gobe naña wañ wañ beleş mat doyañ mar karkuwañ wañ wañ niñ beleş kerd yune yeñbe gogo fe goyen pet yiriñ. ¹³ Be, gor matbe det toneñ buluñ karwo kura huri yara goyen yinmiriñ. Det toneñ kurabe deregon mohon bana mat katiñ, irde kurabe dapña duwi kafuram gote mohon bana mat katiñ, irde funañbe Al Kurunyen mere basañ al falkuk gote mohon bana mat katiñ. ¹⁴ Det toneñ gobe unğura, mata tiñ turuñ yañ wor po goyen forok yirde hanjen gote toneñ. Toneñ goreb Al Kurun watek nalu kurun goyenter asogo irde fulenja irniñ yeñbe megen niñ doyañ mar karkuwañ goyen yawañ gabu yird yird niñ kwamiñ.

¹⁵ Be, goya goyenbe al melak kura forok yeke nurmiriñ. Meremiñbe gahade: “Ga nurnañ! Nebe al kura kawe al goyare wayeñ tiya yeñ ma nurde hikeya wayeñ go gwahade goyen tiyeñ. Niñgeb al kura kawe al goyare wayeñ yeñ ma nurdeya ma ferde uliñhormiñ kerde pet titiñde hiyeñ go gwaha goyen, ne wañ wañ niñ doyañ heñ keñkela hinayiñ marbe Al Kurun beleş guram yirde tareñ yiryen. Gogab kawe al beleş wañ bemel irke kupson al diliñde kuñ memya ma hiyyeñ go gwahade goyen po, ne niñ keñkela doyañ heñ hinayiñ mar wor memya ma henayiñ,” yiriñ.

¹⁶ Be, go kamereb det toneñ buluñ beleş megen niñ doyañ mar karkuwañ gasuñ kura Hiburu mere mat Amagedon inen hanjende gor gabu yiramiñ.

¹⁷ Be, Al Kurunyen miyon 7 goyen funañmiñ

belen naɗa kota kuwemiɗ wogoriɗ. Irkeb Al Kurunyen ya balem bana Doyaɗ Al Kurunyen keperd keperd gasunde gor mat al melak kurun kura forok yeɗbe, “Gog po hubu hihi!” yiriɗ. ¹⁸ Irkeb dagamel teɗ daga kateɗ hururuɗ teɗ niniɗa kurun wor po forok yiriɗ. Al megen forok yamiɗde mat waɗ waɗ gayenter niniɗa gwahade kura ma forok yeɗ hitiɗ. Niniɗa gobe buluɗ wor po, niniɗa teɗ hitiɗ kurun gote folek wor po. ¹⁹ Be, niniɗa go forok yekeb taun kurun Babilon gobe gilgalaɗ irde karwo hamiɗ. Irde taun karkuwaɗ hoyan megen haɗ kurun goyen wor gwamuɗ yurtiɗ hinhan. Al Kurunbe Babilon* taun kurunde niɗ mar gote mata buluɗ goke biɗ sir ma yiriɗ geb, mata buluɗmiɗ goke bearar teɗ gwamuɗ yuriɗ. Gobe beararmiɗ wain yuntiɗeɗ yiriɗ. ²⁰ Irkeb motmot tumɗan hubu hamiɗ, irde dugu wor hubu hamiɗ. ²¹ Irde naɗkiɗde mat kigariɗ bilmiɗ hora yara hitiɗ gore al hitte kurun po katiɗ. Kigariɗ bilmiɗ unkuɗeɗ horam hitiɗ gote kandukmiɗbe 50 kilogram kanduk wor po. Be, kigariɗ hora yara hitiɗ katiɗ goke al belen Al Kurun karan uramiɗ. Mata forok yiriɗ gobe kanduk kurun wor po geb, gogo karan uramiɗ.

17

Belen niɗ bereya Dapɗa duwi kafuramya

¹ Be, Al Kurunyen miyoɗ 7 kuwe 7 yanartiɗ mar goyen unkuɗeɗ kura belen ne hitte waɗbe gaha ninyiɗ: “Wake kure. Kuɗ belen niɗ bere kura fe karkuwaɗ budam hende keperde hi goyen daha

* **16:19:** Babilonbe Rom niɗ yitiɗ.

mat Al Kurun beley gwamuŋ uryeŋ goyen gikala gire. Bere gobe taun kurun kura fe karkuwan kahalte irtin go goyen. ² Megen nin doyan mar karkuwan beley bere goya duwan teŋ teŋ mata teŋ haŋ. Irde megen haŋ marbe wain nene kukuwa heŋ hanŋen yara bere gote mata bulun goyen ulin bana hilyan kun pasi hekeb yende mata po gama irde bulun wor po hitin haŋ,” ninyin.

³ Be, Holi Spirit beley ketal nurkeb miyon gore sawsawa po kurun naŋa bana goŋ nukurin. Gorbe bere kura dapŋa duwi kafuram kura goyen hende kipirtinde hike kinmirin. Dapŋa gote ulinbe bukkenhel. Irde ulindebe Al Kurun sukal ird ird mere po makin hitin. Dapŋa duwi gobe tonan 7ya hirkam 10 minyan hinhin. ⁴ Bere gote amil umŋa kurabe bukkenhel, irde kurabe bukken wor po moŋ digulakya suluk irtin* yara goyen hor irtin hinhin. Irde golya hora kusamuŋ damum hende wor poya gore po umŋa titin. Irde pal hora selweŋ yara damum hende wor po goyen manan yade ulin umŋa irtin hinhin. Bere gobe gisu gol beley irtin goyen hanin yase beley tanartin hinhin. Gisu bana goŋbe mata memyaka lelep mata mormokya goyen makin hitin hinhin. ⁵ Bere gote kimindebe denem kura min banare hitin goyen katin hinhin. Denembe gahade:

**BABILON KURUN, BELEN NIN BERE KURUN
GATE MILIN, IRDE MEGEN NIN MARTE MATA**

* **17:4:** Bukkenya digulakya suluk yirke umŋa hoyan kura forok yen hyen. Umŋa goreb doyan marte amil umŋa yirde hanŋen.

BULUN GOTE MIN BIRIN

⁶ Bere gore Al Kurunyen alya bereya budam gasa yirke kamamin. Irkeb bere gore dari goyen wain nene kukuwa hitin yara tiyyin goyen kinmirin. Mel gobe Yesu gama irkeb gogo gasa yirke kamamin.

Be, nebe bere go kenenbe kukuwamnen wor po nurmirin. ⁷ Irkeb Al Kurunyen miyon nukurin goreb, “Danin kukuwamnen nurde ha? Bere gote min banare hinhin goyen momon giren. Irde dapna duwi kafuram tonan 7, irde hirkam 10 minyan, bere gore go hende keperde hi dapna duwi gote min wor momon giren. ⁸ Be, dapna duwi kafuram wor po kenha gobe bikken hinhin. Gega gayenterbe go ma hi. Goyenbe kame mete dukun wor po kimyan minmon bana mat wan forok yiyen. Forok yekeb mayke huginen kamyen. Goyenbe dapna go megen forok yekeb megen nin mar belen kenenbe dilin fot yenayin. Dapna gobe kamyin gega, sopte forok yekeb gogo kenenbe dilin fot yen aman henayin. Aman henayin mar gote denembe Al Kurun belen megenya nankinya forok yiryinde mat wan wan gayenter Al Kurunya hitek marte denem katin asande gor ma han.

⁹ “Nin geb mata forok yitin goyen bebak tiye yenbe kenkela po dufay hawayin. Dapna duwi kafuram gote tonan 7be higilin 7 nin yitin. Higilin 7 go hendebe belen nin bere goyen keperde hiyen. ¹⁰ Higilin 7 gobe doyan mar karkuwan 7 nin manan yitin. Doyan mar karkuwan 7 bana goyen siptesonobe bikken forok yenbe hubu

hamin. Irde doyan al kurun unku renbe gayenter hi. Irde doyan al kurun funanbe hako wan hi. Yen wayyenbe nalu dolfonde po alya bereyamin doyan yirdeb hubu hiyyen. ¹¹ Dapna duwi kafuram bikken kamtin geb, gayenterbe goyen ma hi gega, kame wayyen goreb doyan mar karkuwan 7 go kamereb al gergeñ kura forok yenbe doyan mar karkuwan 7 goyen basan hen doyan al kurun hiyyen. Gega al go wor doyan mar karkuwan 7 goya tunande. Irde kame bulun wor po hen hubu hiyyen.

¹² “Be, dapna duwi kafuram gote hirkam 10 yenha gobe doyan mar karkuwan hoyan 10 go goyen. Mel gobe alya bereyamin doyan yird yird taren goyen ma yawartin han. Gega doyan mar karkuwan yen sanin ten dapna duwi kafuram goya hen alya bereya doyan yirde hinayin gega, hen ga mon saninmin hubu hiyyen. ¹³ Doyan mar karkuwan 10 gobe dufay unku ren po kerdeb alya bereyamin doyan yird yird tarenmin goyen gabu irde dapna duwi kafuram go po unnayin. ¹⁴ Irde mel gore Sipsip dirnen goyen asogo irdeb fulena irnayin. Goyenpoga Sipsip dirnen gobe doyan marte Kurunmin, irde doyan mar karkuwan gote Kurunmin geb, mel goyen fole yiryen. Sipsip dirnen gote alya bereya yen belen hoy yirde basina yirkeb binde mat fudinde po gama irde han mar wor yenza gabu henbe doyan mar karkuwan ya dapna duwi kafurama goya arde fole yirnayin,” ninyin.

¹⁵ Be, go kamereb Al Kurunyen miyon gore sopte gaha ninyin: “Fe karkuwan hende belen

nin bere gore keperde hike yenha fe gobe al sikken umnam kurayen kurayen, al min hoyan hoyan, nana karkuwan karkuwan, irde al merem kurayen kurayen ten han mar go goyen. ¹⁶ Be, dapna duwi kafuram goya hirkam 10ya yenha goreb belen nin bere goyen bin ar irnayan. Irde bere go bulun bulun irde detmin goran irde ulin unna manan yuguya tikeb kupson hiyyen. Irke bere gote gasan talde neneb kak po kunga tinayan. ¹⁷ Go tinayan gobe gwaha po tinayan yen Al Kurun belen dufay kirtin geb, gogo tinayan. Nin geb doyan mar 10 gore taremin tumnan gabu irde dapna duwi kafuram goyen unenbe gama irnayan gogo. Mel go gwaha ten kun kunbe Al Kurunyen mere gote iginen kawan forok yetek nalu goyen forok yiyyen. ¹⁸ Be, belen nin bere go kenna gobe taun kurun wor po go goyen. Megen nin doyan mar karkuwan hoyan gobe yende yufukde han,” ninyan.

18

Babilon taun gobe bulun hirin

¹ Be, go kamereb Al Kurunyen miyon hoyan kura Al Kurunyen gasunde mat katen hike kinmirin. Yenbe denem yan wor po, ulinde matbe saninmin hushi yara forok yekeb megen kurun gayen wuk yen tukurin. ² Be, yen belen mere kurun po tenbe, “Babilon taun kurun wor po gobe gwamun urtin! Bulun wor po hitin! Irkeb taun gobe ungunayen gasun hitin. Irde det tonen bulun wor bana gon han. Irde nu Al Kurun dilinde tiki minyan gore bana gon hagam yirde han.

³ Naɗa karkuwan karkuwan tumɗan gobe nene kukuwa wor po hetek wain bere gore yunɗin. Wain gobe leplep matamin go goyen. Megen nin doyan mar karkuwan wor bere goya feramin. Irkeb samun ya minyan han marbe bere gore det damum hende hoyan goyen yen hitte damu ten hike hora kurun wor po yade hinhan,” ninyin.

⁴ Be, go kamereb nanɗinde mat al melak hoyan kura forok yeke nurmirin. Mereminbe gahade: “Alya bereyane, bere belen nin go tubul ten kunaɗ.

Gogab yen mata bulun ten hiyen gwahade ma ten hinayin.

Irde matamin gote murungem bulun tiyyen goyen denya ma tenayin.

⁵ Gobe bere gote mata bulunbe pipkatoka irke nanɗin sisan urtin hinhin geb, gago dinen hime.

Al Kurunbe mata bulunmin goke bin sir ma yen hiyen geb, gago dinen hime.

⁶ Nin geb bere gore daha kura dirtin gobe gwahade po wol hen unnan.

Yen belen bulun diryin goyen wolminenbe yen belen dahade duntin goyen teban go hende kerde kurun po unnan.

Yen belen gisuminde wain sanin duniyin goyen wolminenbe wain tareɗ wor po yen belen irde duniyin gote folek goyen gisumin bana gon po wok irde unnan.

⁷ Bere go denem turun yan hen det damum hende wor po goyen po yade aman hen hinhin geb,

dahade aman hej hinhin gwahade po ulin
 misin katen kanduk kurun wor po nurde
 hiyen.

Bindebe yingen turun irdeb,

‘Nebe doyan bere kurun, irde beretap mon.
 Ne hittebe kanduknen nurtek mata kura ma
 forok yiyyen,’ yen hi.

⁸ Ningeb nalu kurare kurab bere gobe matamin
 gote murungem bulun wor po tiyyen:

Garbam bulun ten, binde kanduknen nurde,
 binde kamde hiyen.

Irde kak beley nen unyen.

Al Kurunbe Doyan Al Kurun tarenmin kurun wor
 po gore bere goyen merem yan iryen geb,
 gogo gwahade forok yiyyen,” yirin.

⁹ Be, al melak kura naninde mat forok yirin
 gore sopte gaha yeke nurmirin: “Megen nin
 doyan mar karkuwan bere goya ferde bere gote
 samun damum hende hoyan ten ten mata gama
 iramin marbe bere go humga kuyen gote kakim
 kennayin. Irde yen ge esen obam ten hinayin.

¹⁰ Mel gobe bere go ulin misin kurun katen hike
 kenen kafura wor po hej gisaw po hej esinayin.
 Irdeb, ‘Kafuram wor po! Kafuram wor po! Awo,
 taun kurun wor po Babilon! Bemel po ugun
 naluge forok yihi!’ yenayin.

¹¹ “Irdeb samun ya minyan marbe, ‘Detninin
 kurun damu ten hiyen berebe gogo hubu hihi
 geb, al gore kura detninin damu titek mon,’ yen
 nurdeb bere goke esen obam ten hinayin. ¹² Al
 kura gore wan mel gote gol, silwa, hora kusamun
 wor po, pal hora selwen yara damum hende, irde

amil faykek igiñ wor po, amil umñam bukkenya digulakya suluk yirtiñ, irde silika amilyabe amil bukhel yitiñ goyen damu titek berebe hubu hihi geb, goke esinayiñ. He kurayen kurayen hamiñ kusamuñ wor po gore det yirtiñ, irde kurabe dapña kura elefant gote bilñam belen po det kurayen kurayen yirtiñ, irde he damum hende wor po gore po det yirtiñ, irde barasya ainyabe hora milmulñenya gore po det yirtiñ goyen damu titek bere gobe gogo hubu hihi yeñ goke esinayiñ. ¹³ Irde miyow, biñge hapek yirtek det, irde det kunga tike hamiñ igiñ forok yeñ hanyen goyen, irde he fimiñ hamiñ igiñ wor po kurayen kurayenyabe, wain, olip fimiñ, palawaya witya igiñ muñ wor po, bulmakaw, sipsip, hos, irde nima hos belen yuluñ teñ hanyen goyabe, meten mar dulñenya goyen damu titek bere gobe gogo hubu hihi yeñ goke esinayiñ. Go mar gobe alya bereya kura meten mar yirde bere go unke damu teñ hiyen.

¹⁴ “Go mar goreb bere go kamke kenenbe, ‘Det igiñ yawaren yeñ nurde hayen kurun gobe gigen kamkeb hubu hihi. Samungeya detge igiñ wor poya goyen tumñan yubul taha geb, epte ma sopte yenayiñ!’ innayiñ. ¹⁵ Samun ya miñyan mar bere gore detmiñ damu tike horam yan heñ hanyen mar gobe bere goyen uliñ misiñ kurun po katen hike kenenbe kafura wor po heñ tubul teñ gisaw po hinayiñ. Irde bere goke esen obam tenbe, ¹⁶ ‘Kafuram wor po! Kafuram wor po! Awo, Taun kurun. Taun gobe bere gogo, yeñbe amil igiñ bukkenya digulakya suluk yirtiñ goya bukkenhel yitiñ goya hor yirde hiyen. Irde golya

hora kusamuŋ wor poya pal hora selweŋ yara damum hende wor po goya goyen yade uliŋ umŋa teŋ hiyen. ¹⁷ Goyenbe samuŋmiŋ kuruŋ gobe bemel po hubu hihi!’ yenayiŋ.

“Niŋgeb hakwa doyaŋ yird yird marte karkuwaŋmiŋ, irde alya bereya hakwa hende kuŋ haŋ mar, hakwa hende meten teŋ haŋ maryabe makaŋ alare heŋ dapŋa yade hora teŋ haŋ marya tumŋaŋ bere go tubul teŋ gisaw po hinayiŋ. ¹⁸ Mel gore bere go humga kuŋ hiyen gote kakim keneŋbe kuware po, ‘Bikkenŋbe taun kuruŋ wor po gahade gayen kura ma hinhin!’ yenayiŋ. ¹⁹ Irdeb bere goyen kamde hinhin goke biŋ misiŋ nurdeb yiŋgeŋde tonanŋde mulowo wogordeb eseŋ obam teŋbe, ‘Kafuram wor po! Kafuram wor po! Awo, Taun kuruŋ. Taun bana goŋ al kura hakwa miŋyaŋ mar gobe taun gote samuŋya detmiŋ hakwamiŋ hende yawaŋbe hora kuruŋ yade hanyen. Goyenbe bemel po taun gobe detmiŋ goya tumŋaŋ mugol nihi!’ yenayiŋ. ²⁰ Gega Al Kuruŋyen gasuŋde haŋ marbe bere go kamde hi goke aman henayiŋ. Deŋ Al Kuruŋyen alya bereya aposelya porofetyabe bere gore buluŋ buluŋ dirtiŋ goyen goke merem yaŋ irtiŋ goke aman henayiŋ!” yiriŋ.

²¹ Be, go kamereb Al Kuruŋyen miyoŋ kura saŋiŋmiŋ kuruŋ wor po goreb hora kuruŋ kura goyen teŋbe makaŋ alare timiyyiŋ. Hora gote kuruŋmiŋbe wit bilmiŋ karka teŋ palawa irde hanyen hora kuruŋ wor po hos belen tuluŋ teŋ hanyen go gwahade goyen. Be, Al Kuruŋyen miyoŋ gore hora go temeydeb, “Hora kuruŋ go

makan̄ ala bana kurka gwahade goyen po, ge Babilon taun kurun̄ goyen gad gemeyke makan̄ ala bana kurkun̄ sopte ma po forok yawayin̄. ²² Tikiñde niñ det hap inen̄ han̄yen gote tikiñ, bulelun̄yen tikiñ, bigulyen tikiñyabe al belem̄ tikiñ heñ han̄yen tumñan̄ goyen go ma sopte nurayin̄. Irde samun̄ yare meten̄ ten̄ han̄ mar manan̄ sopte ma yenayin̄. Wit bilmin̄ karka ten̄ palawa ird ird gote hora migirin̄ manan̄ sopte ma po nurayin̄. ²³ Hulsi melak kura ge bana sopte melak ma henayin̄. Tikiñ merere niñ tikiñ sopte ma po nurayin̄. Ge Babilon taun bana goñ samun̄ ya min̄yan̄ marbe hora ten̄ ten̄ san̄in̄min̄ kurun̄ wor po. Gega ge belem̄ merebal matare mata bulun̄ forok irde alya bereya megen hike kwa kurun̄ goyen usi yirarin̄. ²⁴ Taun gobe Al Kurun̄yen alya bereya, irde porofet, irde alya bereya megen hinhan̄ goyen gasa yirke kamamin̄ kurun̄ gote murun̄gem tihibe gago humga kwa,” yirin̄.

19

¹ Be, go kamereb Al Kurun̄yen gasun̄de al buda kurun̄ kura belem̄ kuware gaha yeke nurmirin̄: “Haleluya, Al Kurun̄ turun̄ irnin̄! Al Kurun̄be Dumulgan̄ ten̄ ten̄ Al, den̄embe turun̄ yan̄ wor po, tareñmin̄ manan̄ kurun̄ wor po. ² Yen̄ belem̄ alyen̄ mata yenen̄ igin̄ ma bulun̄ yinen̄ yinen̄ gobe huwak irde fudinde mat ten̄ hiyen. Al Kurun̄be belem̄ niñ bere gore lelep matamin̄de alya bereya megen han̄ kurun̄ gayen bulun̄ yirin̄ goke merem yan̄ ira. Irde bere gore Al Kurun̄yen meten̄ mar gasa yirke kamamin̄ gote wolmin̄en̄ ira,” yamin̄. ³ Be, gwaha yen̄be sopte

po, “Haleluya! Bere go humga kuɲ hi gote kakimbe gwahader hurkuɲ hiyeɲ,” yamiɲ.

⁴ Be, gwaha yekeɓ Al Kurunyen alya bereyat doyaɲ marte parguwak 24 goya det binfut miɲyaɲ sipteɲa gore wulgurut yeɲ Doyaɲ Al Kurunyen gasuɲde keperde hi al Al Kurunyen goyen doloɲ iramiɲ. Irdeb kuware po, “Fudinde wor po! Al Kurunyen turun irniɲ ko!” yamiɲ.

⁵ Irkeb go kamereɓ al melak kura Doyaɲ Al Kurunyen keperd keperd gasuɲde mat forok yeɲbe gaha yiriɲ: “Deɲ Al Kurunyen metenɲ mar, Al Kurunneniɲ turun irnaɲ. Deɲ al deɲem yaɲya deɲem moɲya Al Kurunyen kafura irde haɲ marbe turun irnaɲ!” yiriɲ.

⁶ Irde go kamereɓ al buda kurunyen belen kuware mere tike nurmiriɲ. Meremiɲbe kurunyen wor po, fe kurunyen hamulare solok yeɲ kateɲ migiriɲ teɲ hi yara, irde daga kateɲ hi yara nurmiriɲ. Meremiɲbe gahade: “Haleluya! Al Kurunyen turun irniɲ ko. Al Kurunyen Doyaɲ Al Kurunyen tareɲmiɲ kurunyen wor po. Yeɲ po ga det kurunyen gayen doyaɲ yirde hi. ⁷ Sipsip dirɲen bere teɲ teɲ nalu forok yeke bere* gobe goke gitik titiɲ hi. Niɲgeb goke igiɲ po nurde amanɲ heɲbe deɲem turunyen yaɲ irtek! ⁸ Amil igiɲ wor po wukkeɓ irde milmulken goyen hor ird ird niɲ bere goyen untiɲ. (Amil igiɲ gobe Al Kurunyen alya bereyat mata huwak niɲ yitiɲ.)

⁹ Be, go kamereɓ Al Kurunyen miyoɲ belen ninyiɲ. “Mere kura gahade kaya: ‘Sipsip dirɲen goyen bere teɲ teɲ gote dula matare wanayiɲ

* **19:7:** Bere gobe Yesuyen alya bereya sios niɲ yitiɲ.

marbe aman henayiñ, kayayiñ,” ninyiñ. Irde sopte, “Mere gabe Al Kurunyen mere fudinde wor po,” ninyiñ.

¹⁰ Gwaha ninkeb kahañ miñde kateñ dolon ireñ timiriñ. Irkeb, “Gwaha ma nirayiñ! Ne wor ge yara po Al Kurunyen meten al geb. Kadge yago Yesuyen mere gama irde hañ mar gwahade yara po geb. Yesuyen merebe porofet beñ Holi Spiritiyen sañiñde yitiñ geb, Al Kurun po ga dolon irayiñ!” ninyiñ.

Hos faykek hende kipirtiñ al

¹¹ Be, go kamereb Al Kurunyen gasunde niñ yame hol yekeb hos faykek kura hike kinmiriñ. Hos go hende kipirtiñ hinhin al gote deñembe “Biñde mat fudinde meten ten ten al, irde Mere Fudinde ten ten al”. Yen beñ alyen mata igiñ ma bulun yineñ fulenā ten hiyen gobe mata huwak mat gwaha ten hiyen. ¹² Al gote diliñbe kak melak yara, tonanbe doyañ al kurunyen tonanhor budam hañ. Irde deñe kura uliñde katiñ hi gega, deñe goyen al hoyanbe go ma nurde hañ, yingen po ga nurde hi. ¹³ Yenbe amil ulyañ dari bana kirtiñ goyen hor irtiñ hi. Al gote deñembe “Al Kurunyen Mere.” ¹⁴ Al Kurunyen gasunde niñ fulenā mar beñ al go gama irde hinhan. Mel gobe amil igiñ wor po faykek irde wukken goyen hor yirde hos faykek hende keperde kame gama irde hinhan. ¹⁵ Mehen heñ hinhin al gote mohon bana matbe fulenāre niñ bidila misiñ yañ kura wañ hinhin. Bidila gobe nañ karkuwañ karkuwañ bana hañ mar gasa yird yird niñ mohonde hinhin. Yen beñ nañ

karkuwan̄ karkuwan̄ goyen doyan̄ al kurun̄yen kutum ain beley po irtin̄ goyen tanarde doyan̄ yirde hikeb kafura henayin̄. Irde mel goke Al Kurun̄ san̄in̄min̄ kurun̄ wor po hi gore bearar ten̄ hiyen goyen yikala yire yen̄ wain karka ten̄ fimin̄ gilyan̄ hitin̄ yara yiryen̄. ¹⁶ Amil hor irtin̄ go hendeya bulhekdeyabe den̄e kura gahade katin̄ hin̄hin̄:

MEGEN NIŃ DOYAN̄ MAR KARKUWAN̄DE
KURUN̄MIN̄, IRDE DOYAN̄ MARTE KURUN̄MIN̄

¹⁷ Be, gor mat Al Kurun̄yen miyon̄ kura nan̄a dilin̄ hende huwarde hike kin̄mirin̄. Yen̄ beley kuware po nu kurayen kurayen nan̄a kota foy ten̄ kun̄ hin̄han kurun̄ goyen yinyin̄. “Wanan̄. Wan̄ Al Kurun̄yen dula mata kurun̄de gar gabu irnan̄.

¹⁸ Gogab megen nin̄ doyan̄ mar karkuwan̄, fulen̄a marte karkuwan̄min̄, al tarey min̄yan̄ mar, hosya go hende keperde kun̄ han̄ marya gote hakwam gote gason̄ talde nenayin̄. Al tum̄nan̄, al du-faymin̄de kun̄ han̄ marya meten̄ mar dul̄nen̄ya, irde al den̄em yan̄ya den̄em mon̄yat hakwam gote gason̄ nenayin̄,” yinyin̄.

¹⁹ Be, gor matbe dap̄na duwi kafuram goya megen nin̄ doyan̄ mar karkuwan̄yabe fulen̄a marminya beley hos faykek hende kipirtin̄ hin̄hin̄ al goya fulen̄a marminya arnin̄ yen̄ gabu irde hike yin̄mirin̄. ²⁰ Goyenpoga dap̄na duwi kafuram gobe ten̄ fere tiyamin̄. Porofet falkuk dap̄na duwi kafuram goke ten̄be mata tin̄en̄ turn̄un̄ yan̄ forok yirde hin̄hin̄ al goyen wor yen̄ya tum̄nan̄ fere titin̄ po hinaryum. Usi porofet gobe mata tin̄en̄ goyen forok yirde alya bereya dap̄na duwi kafuram gote den̄em ulin̄de ten̄ dap̄na gote tonen̄

irtin det goyen dolon irde hinhan mar usi yirde hinhin. Niŋgeɓ daɓɓa duwi kafuram goya porofet falkukya gobe dilin gergen hikeya salfa hora humga kuɗ yey fe ala yara hitin bana goɗ yemeyamin. ²¹ Fuleɓa marminɓe fulenɓe nin bidila hos faykek hende hi al gote mohon bana mat waɗ hinhin gore po gasa yirke kamamin. Irkeb nu tumɓanɗa waɗ gason talde nene bin makin hamin.

20

Dama 1,000

¹ Be, gor matbe Al Kurunyen miyon kura gasunminde mat katen hike kinmirin. Yenbe Mete Dukun wor po kimyan minmon bana kurkun kurkun yame goyen hol ird ird ki minyan. Irde haniɗdebe sen kurun wor po kura tanartin manan. ² Yen belen deregon goyen tirin. Deregon gobe kunere bikken hinhin go goyen. Gote deɗembe Unɗura, kurabe Satan inen hanen. Be, Al Kurunyen miyon gore Satan goyen dama 1,000 gwahade fere titinde hiyen yen ten fere tiyyin. ³ Irdeb Satan goyen Mete Dukun wor po bana temeydeb mete gote yame tan kin urdeb al kura belen epte ma hol irnayin yen Al Kurunyen deɗere son iryin. Gogab dama 1,000 bana goɗ Satan belen epte ma alya bereya megen han kurun goyen usi yiryen. Dama 1,000 go hubu hekeb Satan go sinare katyen. Goyenbe ulyande ma hiyen.

⁴ Be, gor matbe alya bereyat mata go yenen igin ma bulun yinen yinen taren minyan marte

keperd keperd gasuŋ yinmiriŋ. Irde Yesu Kristu niŋ tagalde Al Kurunyen mere saŋiŋ po tanarde hike goke al beleiŋ igiŋ ma nurde biŋiŋ walke kamamiŋ marya gote toneŋ yinmiriŋ. Mel gobe dapŋa duwi kafuram goyen ma doloŋ iramiŋ. Irde dapŋa duwi kafuram gote deŋem kimiŋde wet ma haniŋde wet goyen ma katiŋ hinhan. Mel gobe kamtiŋde mat huwardeb dama 1,000 bana goŋ doyaŋ mar heŋ Yesu Kristuya megeŋ gayen doyaŋ irde hinhan. ⁵ Niŋgeb Al Kurunyen mere tanarde heŋ kamamiŋ mar go muŋ po huwarnayiŋ. Munan al kamtiŋ goyen hoyanbe dama 1,000 goyen hubu heke gab huwarnayiŋ. Mata gobe al kamtiŋ mar meheŋde huwarnayiŋ go goyen. ⁶ Al kamtiŋde mat meheŋde huwarnayiŋ mar gobe Al Kurunyen beleiŋ guram yirde saŋiŋ yirde wukkeŋ wor po yiryen. Mel gobe epte ma kak alare kunayiŋ. Kak alare kuŋ kuŋ gobe sopte kamde kamde mata go gwahade goyen. Gwaha titŋenbe Al Kurunya Yesu Kristuya doloŋ yird yird mata doyaŋ mar henayiŋ. Irde dama 1,000 bana goŋ yenya megeŋ gayen doyaŋ yirde hinayiŋ.

Satanbe buluŋ hiyyen

⁷ Be, dama 1,000 hubu hekeb Satan gobe koya bana mat teŋ siŋa irke katyen. ⁸ Irde megeŋ muruŋ kurhan kurhan kuŋ alya bereya budam wor po usi yiryen. Go mar gobe Gokya Magokya yinen hanyen. Satan beleiŋ go mar goyen fulenja teŋ teŋ niŋ gabu yiryen. Mel go gabu yirkeŋ makaŋde niŋ sawsawa yara budam wor po, epte ma kapyan hetek henayiŋ. ⁹ Be, go mar gobe bantoto kurunyen wor po goyen sam irde kuŋbe Al

Kuruɗyen alya bereya beɓen keperde haɗ gasuɗ goyen buluɗ yirniɗ yeɗ milgu yirnaɗiɗ. Al Kuruɗyen alya bereya keperde haɗ gasuɗ gobe taun Al Kuruɗ beɓen goke amaɗenɗ nurd unenɗ hiyen go goyen. Be, alya bereya Gokya Magokya yineɗ haɗyen mar gore taun go milgu irnaɗiɗ gega, kak beɓen naɗkiɗde mat kateɗ gwamuɗ yuryeɗ. ¹⁰ Irkeb mel go usi yiryenɗ al Uɗgura gobe sopte teɗ salfa hora kak hitiɗ ala bana temeyke hiyenɗ. Kak ala bana goɗbe dapɗa duwi kafuram goya porofet falkukya yimiɗtiɗ haryen. Niɗgeb Satanya dapɗa duwi kafuramaɗa porofet falkukya gobe naɗkahalya wawuɗnya hugineɗ uliɗ misiɗ kuruɗ po kateɗ hinayɗiɗ.

Al kamtiɗ goyen Al Kuruɗ beɓen merere yiryen

¹¹ Be, gor matbe Doyaɗ Al Kuruɗ beɓen keperd keperd gasuɗmiɗ kuruɗ faykek wor po hende kipiɗtiɗ hike kinmiriɗ. Megenya naɗkiɗyabe yeɗ hitte mat busaharyum gega, gor kura kutek moɗ geb, hubu po haryum. ¹² Irde kamamiɗ mar kuruɗ goyen al denem yanya denem miɗmoɗnya Doyaɗ Al Kuruɗyen keperd keperd gasuɗ diliɗ mar huwarde hike yinmiriɗ. Gorbe asaɗ hol yir-tiɗ hinhan. Irke asaɗ hoyan kura hol yiriɗ. Asaɗ gobe Al Kuruɗya hugineɗ hitek mar gote denem katiɗ asaɗ. Al kamtiɗbe megen henya mata teɗ hinhan kuruɗ goyen asaɗ buda goyen bana goɗ katiɗ geb, gor mat mata dahade teɗ hinhan gote muruɗgem tamiɗ. ¹³ Makaan alare kamamiɗ marya mete titiɗ marya goyen tumɗanɗ merere huward huward niɗ Al Kuruɗ hitte wayamiɗ.

Wanbe megen henya mata ten hinhan gote murungem yawaramin. ¹⁴ Irkeb Al Kurun belen kamde kamde mataya al kamtin yerde hanjen gasunya goyen kak alare yimiyyin. Kak ala gobe al kamtinde mat huwarnayin mar kura sopte huginen kamde kamde gasunde kunayin go goyenbe gogo. ¹⁵ Ningeb al kurate denem Al Kurunya huginen hitek marte denem asande katin bana gon ma hikeb yade kak ala goyenter yimiyyin.

21

Nankin gergenya megen gergenya

¹ Be, gor mat nankinya megenya bikkek gobe hubu hekeb nankinya megenya gergen goyen yinmirin. Megen gobe makan minjon. ² Be, Taun Wukken Yerusalem gergen wor po gobe Al Kurunyen gasunde mat katen hike kinmirin. Taun gobe bere fonen kura un belen wan tupi ten kun kun ge ulin unna kusamun wor po ten hanjen go gwahade goyen po Doyan Al Kurun wan wan nin gitik titin hinhin. ³ Be, go kamereb Doyan Al Kurunyen keperd keperd gasunde gor mat al melak kura forok yeke nurmirin. Mereminbe gahade: "Gayenter Al Kurun hen hen gasunbe alya bereya hande gor hi! Yenbe mel goya hiyen. Irkeb mel gobe Al Kurunyen alya bereya henayin. Irkeb Al Kurun yingenbe mel goya henbe yende Al Kurun hiyyen. ⁴ Yen belen alya bereyat dilin fimin halde yunyen. Mata bikkekya det bikkekyabe hubu henayin geb, kamde kamde mata hubu hiyyen, irde al kamke esen obam ten ten mata wor hubu

hiyyeñ. Go ma esinayiñ, irde uliñ misin ma katnayiñ,” yiriñ.

⁵ Be, Doyañ Al Kurunyen keperd keperd gasuñde kipirtin hinhin al goreb, “Det kurun gayen tumñan gergeñ wor po yirde hime!” yiriñ. Irdeb, “Mere gabe fudinde yeñ nurtek mere geb, asañde kaya,” ninyiñ.

⁶ Irdeb gaha ninyiñ: “Metenebe pasi irhem. Nebe Alfaya Omegaya, det kurun gayen min urmiriñ al, irde pasi ird ird al. Nebe mehenñde wor po hinhem, irde kame wor heñ. Al kura fe niñ yirkeb Al Kurunya hugiñeñ heñ heñ goyen fe diliñde mat fe marde wañ hi yara goyen yuneñ. Fe goyen yuneñbe damu tinañ ma yineñ, duliñ yuneñ. ⁷ Al kura al bulun fole iryenbe det gergeñ hitiñ kurun goyen tumñan yawaryeñ. Irke nebe yende Al Kurun hemekeb yeñbe diriñne hiyyeñ. ⁸ Gega kanduk forok yeñ yeñ ge kafura heñ hañ mar, Al Kurun niñ dufaymiñ tareñ ma irde hañ mar, dufay bulun heñ hañ mar, al gasa yirke kamde kamde mar, lelep mata teñ hañ mar, merebal kurayen kurayen yirde hañ mar, det toneñ yirde doloñ yirde hañ maryabe, usi marya gote heñ heñ gasuñbe salfa hora humga kuñ fe ala yara hitiñ bana goñ po hinayiñ. Gor kunayiñ gobe kamtiñde mat huwarnayiñ gega, sopte hugiñeñ kamde kamde gasuñde kunayiñ go goyenbe gogo,” yiriñ.

Yerusalem gergeñ

⁹ Be, Al Kurunyen miyoñ 7 mata kafuram 7 kuwe bana hitiñ 7 goyen kura tanarde hinhin miyoñ goreb, “Wake kure. Kuñ Sipsip diriñeñ

gote berem gikala giren,” ninyin. ¹⁰ Irdeb Holi Spirit beɓe ketal nurke nade dugu kurun hende hoyan wor pore gor nukun Taun Wukkek wor po goyen nikala niryin. Taun Wukkek wor po gobe Yerusalem gergen Al Kurunyen gasunde mat katen hinhin. ¹¹ Taun kurun gobe Al Kurunyen sanin turnun yan wor po gore hushi melak yara agat uryin. Agat uryin gobe hora kusamun wor po beɓe teɓ hanyen yara tiyyin. Yaspaya kristal wukkenya yara agat wor po uryin. ¹² Taun gobe koya kurun miliɓ hende hoyan wor po beɓe miɓgu irtin. Koya gobe yamemiɓ 12 miɓyan. Yamere gorbe Al Kurunyen miyon 12 hinhan. Yame 12 go hendebe Israel marte al miɓ 12 gote deɓem katin hinhan. ¹³ Yame 12 goyen karwobe naɓa waɓ waɓ beɓe hinhan. Irde karwo kurabe naɓa kurkur beɓe hinhan. Irde yame karwo kurabe gegelhek kurhan hinhan, munan karwo kurabe kurhan hinhan. ¹⁴ Koya kurun gobe hora karkuwan 12 go hende yirtin. Hora karkuwan 12 go hendebe Sipsip dirɓe gote mere basan mar aposel 12 gote deɓem katin hinhan.

¹⁵ Be, Al Kurunyen miyon neya mere tiyaryum gore taunya koya, irde yamemiɓya gote kurunmin tunan tiye yeɓe tunan teɓ teɓe nin kutum gol beɓe irtin goyen haniɓde tanarde hinhin. ¹⁶ Taun kurun gobe murun sipte miɓyan. Sobaminiya pelyenmiɓyabe tunande wor po. Al Kurunyen miyon beɓe kutum go teɓ taun kurun goyen tunan teɓ kenenbe ulyanmiɓe 2,200 kilomita, irde pelyenmiɓya huwa hurkutinnya wor gwahade po. ¹⁷ Yeɓ beɓe taun gote

koya tolokminj tunaj tiyyinbe 65 mita. Miyon gore tunaj tiyyin gobe megen nin det gote kurunminj tunaj tenj tenje nin kutum tenje tunaj tiyyin.* 18 Yerusalem taun gergej gote koyabe hora kusamun kura yaspa inen hanjen gore po irtin. Irde taun gobe gol belen po irtin. Gol gobe galas yara tikin minjon, wukken wor po. 19 Irde koya gote minje hora kusamun wor po kurayen kurayen gore yade umja yirtin. Koya gote minj 12 bana gon mehendebe yaspa hora belen irtin. Kamere nin minj gobe sapaia hora belen irtin. Karwominje aget hora, sipteminje emeral hora, 20 siptesononminje sadonikis, 6minje hora bukken konilian, 7minje hora wulsakken krisolait, 8minje hora digulak yara beril, 9minje hora wulsakken yara topas, 10minje krisopires hora, 11minje haiasin hora, funaj 12minje ametis hora belen po umja yirtin hinhan. 21 Koya gote yame 12 gobe pal hora karkuwan wor po selwen yara gore po yirtin. Yame goyen unken unkenbe pal hora unken unken belen po yirtin. Taun kurun go bana gon nin belenbe gol belen po yirtin. Gol gobe tikin minjon galas yara wukken wor po.

22 Be, taun bana gonbe Al Kurunyen ya balem kura ma kinmirin. Ya balem gobe hoyan mon, Kurunnin Al Kurun tarenmin kurun wor po

* **21:17:** Al Kurunyen miyon belen megen nin det gote kurunminj tunaj tenj tenje nin kutum tenj Al Kurunyen gasunde nin Yerusalem gote kurunminj tunaj tiyyin gobe Yon belen kenen bebak tenj tenj ge gwaha tiyyin. Ningeb “kilomita, mita” gobe nen al belen bebak tenj tenj ge po, Yerusalem kurunminj fudinbe epte ma nurtek.

goya Sipsip dirɲenya yiɲgeɲbe ya balem go goyen geb, gogo kura ma kinmiriɲ. ²³ Taun bana goɲbe Al Kurunyen tareɲmiɲ turɲuɲ yaɲ wor po gore hulsɪ melak heɲ agat urde hiyen gwahade po teɲ hikeb naɲaya gagasiya niɲ ma nurde haɲ. Taun bana goɲ niɲ hulsibe Sipsip dirɲeɲ gogo. ²⁴ Taun gote hulsɪ goyen temeykeb naɲa karkuwaɲ karkuwaɲ bana haɲ marbe taun gote hulsire kuɲ hinayiɲ, irde megen niɲ doyaɲ mar karkuwaɲ beɲeɲ samuɲmiɲ igiɲ wor po goyen taun bana goɲ yade wanayiɲ. ²⁵ Taun bana goɲbe wawuɲ miɲmoɲ geb, taun gote koya yamebe hugiɲeɲ hoɲ hinayiɲ. ²⁶ Alya bereya naɲa karkuwaɲ karkuwaɲ bana haɲ gore samuɲmiɲ igiɲ wor poya horamiɲya yad taun bana goɲ hurkunayiɲ. ²⁷ Goyenbe det kura Al Kurunɲ diliɲde wukkeɲ moɲbe taun bana goɲ epte ma yad hurkunayiɲ. Irde al kura mata memyak teɲ haɲ marya usi mata teɲ haɲ maryabe epte ma taun bana goɲ hurkunayiɲ. Gwahade yarabe Al Kurunɲya hugiɲeɲ hinayiɲ marte deɲem katiɲ asaɲde deɲem haɲ mar go po hinayiɲ. Asaɲ gobe Sipsip dirɲeɲ gote asaɲ.

22

Al Kurunɲya hugiɲeɲ heɲ heɲ saɲiɲ miɲyaɲ fe kurunɲ

¹ Be, gor matbe Al Kurunɲyen miyoɲ gore Al Kurunɲya hugiɲeɲ heɲ heɲ saɲiɲ miɲyaɲ fe kurunɲ goyen nikala nirke kinmiriɲ. Fe gobe galas yara wukkeɲ wor po, irde Al Kurunɲya Sipsip dirɲeɲyat keperd keperd gasuɲde mat kateɲ hinhiɲ. ² Irdeb

taun bana goŋ beleş kurunmin kahalyaŋ gama irde kuŋ hinhin. Fe goyen siŋa kurhan kurhanbe he kura igineŋ nene Al Kurunya hugineŋ heŋ heŋ he go hinhan. He gote igineŋbe dama unkuřen bana wawuŋ 12 gwahade igineŋ heŋ hiyen. Gagasiŋ gagasiŋ turte igineŋ heŋ hiyen. Irde he gote yuwalneŋbe alya bereya naŋa karkuwan karkuwan bana haŋ mar gote garbam sope ird ird tareŋ minyaŋ. ³ Taun bana goŋbe det kura Al Kurun beleş karan yurtineŋbe goŋ ma hinayiŋ. Irde Al Kurunya Sipsip dirneŋyat keperd keperd gasuŋbe taun bana goŋ hiyeŋ. Irkeb meten marmineŋ beleş meten teŋ yunen hinayiŋ. ⁴ Mel gobe Sipsip dirneŋ gote kimiŋ kennayiŋ, irde deŋembe mel gote kimiŋde katiŋ hiyeŋ. ⁵ Taun bana goŋbe wawuŋ minmoŋ hiyyeŋ. Irde Al Kurunbe Doyaŋ Al Kurun geb, tareŋmin turuŋ yaŋ gore hulsi yara heŋ agat urde hiyeŋ. Irkeb hulsiya nanaya niŋ ma nurde hinayiŋ. Mel gobe gwahader taun bana det kurun goyen doyaŋ yirde hinayiŋ. ⁶ Be, Al Kurunyen miyoŋ goreb, “Mere gabe fudinde, irde hekkeŋ nurtek hi. Doyaŋ Al Kurunbe mere basan marmineŋ gote toneŋde Al Kurun. Yeŋ beleş heŋ ga ma mata kura forok yenayiŋ goyen meten marmineŋ yikala yire yeŋbe miyoŋmin teŋ kerke katiŋ,” niniŋ.

Yesube wayyen

⁷ Be, Yesu beleş gaha yiriŋ: “Ga nurnaŋ! Nebe heŋ ga ma wayeŋ! Al kura Al Kurun beleş kame mata dahade forok yiryen goke asaŋde gar katiŋ mere gayen gama irde haŋ marbe Al Kurun beleş guram yirde saŋiŋ yiryen!” yiriŋ.

⁸ Be, ne Yon gabe mata kame forok yenayin kurun goyen nikala nirde momon nirtin goyen nurmirin, irde kinmirin. Gwaha tenbe Al Kurunyen miyon mata go nikala niryin al goyen dolon ire yen kahan minde wulgurut yimirin.

⁹ Gega miyon goreb, “Gwaha ma nirayin! Ne wor ge yara po Al Kurunyen meten al geb. Nebe geya kadge yago porofetya mere asan gayen bana katin gayen gama irde han marya goyen yara po geb. Ningeb Al Kurun po dolon irayin!” ninyin.

¹⁰ Irdeb gaha ninyin: “Al Kurun belen kame mata dahade forok yiryen goke asande gar katin mere gate iginenbe hen ga mon forok yenayin geb, asan gayen tan sanin ma irayin. ¹¹ Irde al kura mata bulun ten han marbe yubul tike gwahade po ten hinayin. Al kura dufay bulun po gama irde han mar wor yubul tike gwahade po ten hinayin. Irde al kura mata huwak ten han marbe yubul tike gwahade po ten hinayin. Al kura mata wukkeken ten han yen mar wor yubul tike gwahade po ten hinayin,” ninyin.

¹² Irdeb gaha yirin: “Ga nurnan, nebe hen ga ma wayen! Waye yenbe al han kurun goyen mata daha daha ten hitin gote murungem yawanbe yunen. ¹³ Nebe Alfaya Omegaya, det kurun gayen min urmirin al, irde pasi ird ird al. Nebe mehen de wor po hinhem, irde kame wor hen.

¹⁴ “Be, al kura amil halde han yen yara matamin wukkeken yirde han marbe Al Kurun belen guram yirde tarey yiryen. Go mar gobe nene Al Kurunya huginen hitek he iginen goyen igin netek han. Irde taun kurun gote koya yame bana

igin hurkutek haɗ. ¹⁵ Gega taun go siɗarebe Al Kurunyen mere tubul titin mar hinayin. Go mar gobe merebal kurayen kurayen yird yird mata teɗ haɗ mar, leplep mata teɗ haɗ mar, al gasa yirke kamde haɗ mar, det toneɗ doloɗ yirde haɗ mar, irde usi mereya mataya nin amanɗen nurde haɗ mar kurun gobe taun siɗare hinayin.

¹⁶ “Ne Yesu gare deɗ alya bereyane sios goyen merene momon dird dird nin teɗbe miyonɗe teɗ kermeke kurkun. Nebe Dewityen minde mat watin geb, nebe Dewit Urmin. Irde nebe Bayfon agatɗen kurun wor po go goyen,” yirin.

¹⁷ Be, Holi Spiritiya siosya beɗen, “Wanaɗ!” yaryum. Irkeb al kura mere go nuramin mar wor, “Wanaɗ!” yamin. Fudinde, al kura hugin hitek fe nin kamde haɗ marbe waɗ fe go nenayin. Fe gobe al kura goke nurde haɗ marbe damum mon dulin nenayin.

¹⁸ Be, ne Yonbe Al Kurun beɗen kame mata dahade forok yiryen goke asande katin mere gayen nurtin mar goyen gahade hayhay yirde hime: al kura mere ga hende hoyan kura sopte kiryen al gobe Al Kurun beɗen asan gayen bana mata kafuram gwahade forok yenayin yitin goyen al go hende forok iryen. ¹⁹ Irde al kura asande gar katin mere kura teɗ siɗa iryen al gobe nene Al Kurunya huginɗen hitek he iginɗen goyen netek mar haɗ bana gon mat Al Kurun beɗen teɗ siɗa iryen. Irde taun wukken wor po goke asande gar katin taun bana gon epte ma hiyen.

²⁰ Be, mata forok yenayin kurun gayen kawan po tagalde hi al gore, “Gwaha, fudinde wor po,

nebe heɗ ga ma wayeɗ, ” yeɗ hi.

Gwaha, Doyaɗ Al Kurunɗ Yesu, wayayin!

²¹ Doyaɗ Al Kurunɗ Yesu beɗeɗ Al Kurunɗen alya bereya buninɗen yirde igin igin yirde hiwonɗen yeɗ gusunɗen irde hime. Fudinde wor po.

lxxx

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 3 Mar 2023 from source files dated 9 Oct 2020

dbba218f-41f3-5f08-b0b6-2a7c919093ab